

T 3150/3432.52

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1938

澤州府志卷之四十一

藝文志

御製 文告 經籍目 金石錄 文 襍著 賦 詩餘

紀事附 兵燹 祥異 雜志 叢諱

夫稽緝前言乃考鏡得失之林志有所不得及者文及之志有所不易及者詩及之藝文之志志文也亦志志也

天章之爛照曜山川大告之文隱深閭井豈徒著廣博擷菁英取麗悅耳目乎哉故志藝文第八

論記詩賦前人可傳者甚夥澤之文獻美媿中州如闌入本志於義無取墓志行狀志其人亦應求其詳他志有兼收者第累紙不盡殊積卷帙茲槩節入本傳下至奏劄有關此間郡邑者應備載不則縱所繫甚大亦屬

哈佛大學漢和圖書館珍藏印

中朝文獻之徵業在天下不在一鄉若羣公章疏盡行
登紀竊慮數尺書猶不足使挂一漏萬不無訾警且盛
德大業不做天壤何必偏隅矜爲獨得耶他若本土致
語雖單詞隻字不敢輕棄

澤州府

御製

御書賜知州臣佟國瓏

萬樹江邊杏新開一夜風滿園深淺色照在綠波中

賜澤州知州臣陶自悅

憇小陵河

河水流不息晝夜去涓涓昔爲征戰地今是豫遊年
駐馬孤岑外移舟古岸前殘陽下新柳約畧見春妍

賜高平縣知縣臣梅建

咏蒙恬所築長城

萬里經營到海涯紛紛調發逐浮誇當時用盡生民力
天下何曾屬爾家

賜大學士臣吳璵臣陳廷敬各一

山莊書懷

待旦勤勤望雨晴京南塞北察安氓已知雲歛無霖潦未
卜田間有稻稞八月秋成歡宇內四方風景解春卿大川
舟楫同憂感更覺凝承信洛英

賜吏部尚書臣陳廷敬

西湖二首

湖光開澗灩臨幸及芳時淺翠堆山色輕香拂水滄彩椀

看自動畫鷁覺平移靜坐觀羣類資生得所宜
晴雨分山色臨流啟壯觀樓臺橫水面梵塔插雲端忽訝
松間竹當誇巖下蘭風光被草木無處不成歡
賜大學士臣陳廷敬
此首書金扇一柄

午日

令序當重午南臺日正中玉階鳴瀑水瑤軫奏薰風菖葉
浮杯綠榴花照檻紅臨流看競渡轉憶濟川功

麥秋盈野志喜

去冬盈尺雪占年今夏脩脩麥隴全萬畝皆齊誕降穀千
家秀實已登阡先憂暘雨惟民疾後樂時豐紀玉箋志喜
雕蟲晚學愧薰風南至影花甄

回舟至常州府是夜甘霖大沛

夏淺雲高惜阪田江南比歲賴豐年麥秋徧野堪收穫靈
雨愆期倍惕乾夜半篷牕聞浙瀝曉來練浦聽潺湲此行
往返無他事益見民情遠近虔

賜大學士

臣

陳廷敬詩

并序

朕覽皇清文穎內大學士陳廷敬作各體詩清雅醇厚非
積字累句之初學所能窺也故作五言近體一律以表風
度

橫經召視草記事翼鴻毛禮義傳家訓清新授紫毫房姚
比點韻李杜並詩豪何似昇平相開懷宮錦袍

賜輓大學士

臣

陳廷敬

世傳詩賦重名在獨遺榮去歲傷元輔連年痛大羹朝恩
葵衷勵國典玉衡平儒雅空階歎長嗟光潤生

賜編修臣陳壯履

初寒

灑雪凝霜正渺漫曉來朔色滿林巒何當吹徧鄒陽律盡
却人間黍谷寒

賜山東鹽道臣王廷掄

南巡舟行會通河雜咏四首之一

遲日煙雲靜芳春膏澤多時暘時雨望祝稔並祥和

插花瓶詩

香泉一勺淨無塵小器翻成席上珍密把英華齊借口虛
將心腹暗藏春送行不是沙頭玉引恨元非井底銀貪揀
梢枝停立久閨中徧稱曉妝人金扇一柄

賜翰林院掌院學士臣陳廷敬

曲江絲柳變煙條寒谷冰隨暖氣消纔見春光生綺陌旋

聞天樂動雲韶倣董其昌書

空山無鳥跡何物知人意委曲結繩文離披學書字

賜戶部尚書臣陳廷敬

仕倦成流落游頻慣轉蓬熱來隨意任涼至逐緣東入境

親疎集他鄉彼此同暖衣兼飽食但覺媿梁鴻臨米芾書

又臨畫錦堂記一卷 獅子賦一卷

香閣東山下煙花象外幽懸燈千嶂夕捲幔五湖秋畫壁

餘鴻鴈紗牕宿斗牛更疑天路上夢與五雲遊倣董其昌書扇一柄

賜吏部尚書臣陳廷敬

天漢支機罷仙嶺博碁餘零陵舊是燕昆池本學魚雲移
蓮勢出苔駁錦紋疏還當穀城下別自解兵書臨米芾書

千里楓林煙雨深無朝無暮有猿吟停橈靜聽曲中意此
是雲山韶濩音臨子昂

晉水千廬合汾橋萬國從開唐天業盛入沛聖恩濃下輦
迴三象題碑駐六龍睿明懸日月千載此時逢臨米帝

新加大邑綬仍黃近與單車向洛陽顧盼一過丞相府風
流三接令公香南川粳稻花侵縣西嶺雲霞色滿堂其道

進賢蒙上賞看君幾歲作臺郎

和風吹綠野梅雨灑芳田細流添舊澗宿霧足朝煙鴈溼

行無次花沾色更鮮對此欣登歲披襟弄五絃俱臨董又其昌

錄周子愛蓮說金扇一柄 千字文一卷臨米帝

賜大學士臣陳廷敬

波羅密多心經一冊

墨刻穹覽寺碑文一冊

東嶽廟碑文一卷

賜編修臣陳壯履

酌酒會臨泉石抱琴好倚長松南園露葵朝折東谷黃梁
夜春

山茶相對本誰栽細雨無人我獨來說似與君君不見爛

紅如火雪中開錄東坡句金扇一柄

山橫鶴嶺水學龍津瑞雲一片仙童兩人三秋雲薄九日

寒新真花暫落畫樹長春橫石臨砌飛煙枕嶺壁遶藤苗

牕銜竹影菊落秋潭桐疎寒井仁者可樂將因愛靜傲黃庭堅

書至仁山銘

渭水自縈秦塞曲黃山舊遶漢宮斜鑾輿迥出千門柳閣

道迴看上苑花雲裏帝城雙鳳闕雨中春樹萬人家爲乘
陽氣行時令不是宸游玩物華金扇一柄

賜大學士臣陳廷敬

龍飛鳳舞

清慎勤

格物

點翰堂

清立堂

博文約禮

午亭山村

賜編修臣陳壯履生母孺人李氏

般若相

賜編修臣陳壯履

凝暉堂

賜山東鹽法道臣王廷掄父臣王璇

古稀人瑞

賜大學士臣陳廷敬

朝罷香烟携滿袖詩成珠玉在揮毫

精研書史知今古慎典絲綸見泰平

謹言慎行皆臣職教孝成忠是朕心

春歸喬木濃陰茂秋到黃花晚節香

賜編修臣陳壯履

雲裏帝城雙鳳闕雨中春樹萬人家

傳家惟力學報國在持忠

書閣山雲起琴齋澗月留

賜太僕寺少卿臣王廷揚

晨搖玉佩趨金殿夕捧天書拜瑣闈

賜大學士臣田從典

百工允敕重朝端職握樞機未易殫出納望同天北斗清芬品擬省中蘭分曹政洽調元氣補衷心懸効寸丹日昃共期勞庶績履聲長聽下金鑾

賜大學士臣田從典

清謹公方

元衡介福

德重純誠嘉猷資輔弼禮崇惠養眉壽備恩榮

聖祖賜文淵閣大學士兼吏部尚書加三級謚文貞陳廷敬碑

文

國家密勿之地必需弼亮之臣用以効對揚資啟沃故存則寵綏罔斃歿則優卹有加備舉哀榮眷深終始典至渥也爾陳廷敬秉資純粹造詣淵深早以儒宗蔚爲邦彥擢居翰苑備顧問於燕閒旋侍講筵能敷陳於經義叅知機務總領清班允摘翰墨之華克樹棟梁之望列卿徧陟舉百度以惟貞政府延登贊萬幾而倍凜數秉禮闈之繩尺懸鑒冰壺每修秘府之圖書抽思緗帙溯風規之嶽嶽大體克敦念雅量之休休和衷共濟屬倚毗之甚切乃引退之亟陳已許就閒仍留視事方謂昇平之克享獲保遐年不圖痼疾之忽嬰奄歸長夜眷懷在昔彌惻於心遣皇子以臨喪製輓詩而示意文貞賜謚史冊丕昭於戲儀型未墜臣節久而彌光寵命長新

國恩傳於勿替貞珉傑峙永炳千秋

聖祖諭祭大學士陳廷敬碑文

皇帝諭祭經筵講官文淵閣大學士兼吏部尚書加三級謚文貞陳子之靈曰國家表式班聯必資舊德登崇輔弼實籍端人惟恪勤罔間於初終則優卹無殊乎存歿哀榮具備典禮爲昭爾陳廷敬器資厚重品詣深純妙選詞垣游登講幄文章博雅播令望於藝林經史淹通著芳型於翰苑遂參加夫密勿旋總領夫清華徧陟列卿長部曹而釐績允諧重望虛政府以延登矢志靖共並仰老成之度屢持文炳彌堅皎潔之操宣德意於絲綸對揚有體考秘文於圖史裁鑒無遺蓋在仕籍者餘五十年而凜忠貞者恒如一日比念連章引退俾就私第以賜閒復緣要地需人暫入黃扉而視事方遐年之待享何疾疾之忽嬰專遣侍醫往調良藥頻加存問馳賜珍羞尙異有瘳俄驚長逝特製御詩哀輓用寫眷懷旋命皇子來臨躬行奠醑白金頒於內帑文木錫自尙方謚以文貞予之祭塋於戲謨猷未泯思風度以猶存恩禮攸崇勒鼎鍾而勿替爾靈不昧尙其歆承

聖祖加祭大學士陳廷敬文

皇帝諭祭經筵講官文淵閣大學士兼吏部尚書加三級謚文貞陳子之靈曰惟爾文章宿老輔弼良臣游陟綸闈歷始終而一節參陪禁闈凜夙夜以惟虔晚節彌堅蹇蹇匪躬之義和衷共濟休休容物之懷炳焉華國之文館閣資爲矩矱屹矣立朝之概班聯奉以儀型方期享夫大年何奄歸乎長夜緬懷勞績日篤不忘申錫彝章再頒牲醴於戲軌範如存

養舊之恩罔替恩綸重賁報忠之典從隆惟爾有靈尙其來享

御賜光祿大夫太子太師文華殿大學士兼吏部尙書加五級致仕諡文端田從典碑文

雍正六年

朕惟登崇良弼首重端方翼贊鴻猷允資勤慎生被顯榮之秩沒垂賜卹之文所以彰德酬庸至優且渥也爾田從典剛正持身公忠體國蔚賢聲於東粵績奏循良標令望於西臺操稱清白旋蒙殊擢歷晉崇班久佐中樞仰承廟算總憲綱而勅紀掌邦賦以宣猷逮乎簡任天曹總銓衡以計吏俾參政府抒誠盡以論思洵克贊夫昇平方用深乎毗倚豈期告瘁陳情引年朕篤念老成特隆異數賜金予餞沛眷注之恩存問加銜彰憲言之典謂林泉之長享乃疾疾之遽嬰奄逝

忽聞軫傷實切旣遣員以襄事復考行以易名用勒豐碑永膺嘉諡於戲碩德猶存琬琰燦松楸之色殊恩疊賁絲綸流泉壤之光垂庇後人昭示奕禩不亦休與

諭祭太子太師文華殿大學士兼吏部尙書加五級致仕諡

文端田從典文

雍正六年

皇帝諭祭太子太師文華殿大學士兼吏部尙書加五級致仕諡文端田從典之靈曰國家任賢輔治特隆機務之司人臣論道經邦端賴老成之器必効忱宣力懋績無間於初終斯賜卹易名恩禮有加於存沒爾田從典宅心純恪植品端方由邑宰而內擢臺垣聲華茂著遷納言而歷躋卿貳勤慎彌昭屬憲長之特膺官方是飭繼大農之旋任邦式惟均命總銓衡允克澄清乎吏治用登政府洵堪寅亮夫天工乃精

澤州府志 卷之四十一
力之就衰致引年之頻請朕情深眷舊特予告歸厚賜帑金俾遂林泉之樂寵加郊餞永爲寮采之光方冀獲享期頤詎意忽聞奄逝良深軫惻用沛殊施經紀其喪俾專司以襄事推恩後嗣復申諭以注存祭醑遠頒哀榮備至於戲想風度於平生儀型在望播芳徽於奕禩綸綍常新爾靈有知尙其歆格

卷之四十一終

澤州府志卷之四十二

文告

部議澤州改州爲府劄付

雍正六年四月十八日蒙 巡撫都察院加二級覺羅石案驗本年四月十七日准吏部咨文選清吏司案呈吏科抄出山西巡撫覺羅石 題前事雍正六年二月二十日奉

旨該部議奏欽此會議得山西巡撫覺羅石疏稱蒲州西通秦蜀南隣豫省實爲三晉之咽喉其地勢之遼濶衝要已不同於他邑其賦稅則蒲州八萬七千有奇加以猗氏臨晉萬全榮河四大屬邑共計二十九萬餘兩是又倍於他郡至澤州界接中州路通南北民情狡悍尤稱難治之區

其賦稅則澤州六萬二千有奇加以高平陽城沁水陵川四大屬邑共計一十九萬九千餘兩亦稱繁重當此數省接壤衝繁之重地僅設知州一員不足以資彈壓且直隸知州既有刑名錢穀之任又有督察盤查之責再欲令其稽查匪類巡察山鄉實不能有分身之術莫若陞爲府另設知府一員同知一員經歷一員改蒲澤爲附郭之首邑以一郡統轄五屬則有知府以專其督察有同知以資其佐理有經歷以備其差遣而蒲澤二令專理一邑之事俾各悉心辦理不致有顧此失彼之虞所有吏目應改設典史再查蒲州之永樂鎮距城一百二十里之遙僅設巡檢一員澤州之攔車鎮係南北行商往來住宿之所雖設有附近之星輶驛丞一員均不足以衛地方并請將二府

新設之同知分防於永樂攔車二鎮以壯其控制之勢專其緝捕之責於地方更有相宜等語查山西蒲澤二州接壤數省地方衝要其所屬大邑俱各錢糧浩繁知州一官本任既有刑名錢穀屬縣復須督緝盤查實難兼顧應如該撫所請陞州爲府各另設知府一員同知一員經歷一員卽以蒲澤爲附郭首邑猗氏高平等縣仍照舊令其統轄其吏目改爲典史新設二府同知准其分防於永樂攔車二鎮地方專其緝捕又疏稱吏攢人等俱照新設朔寧二府之例添設俸工等項應蒲澤二州地丁項下支給等語應如該撫所請照朔寧二府之例知府衙門添設典史九名同知衙門添設典史一名經歷司衙門添設攢典一名其應需官俸役食等項應在於新設附郭縣治原額地

丁銀內動支應仍令該撫將添支數目并裁扣數目分晰造冊報部查核又疏稱知府等官衙署作何添設之處地方官查明確估另行咨部其學宮蒲澤二州原各有州學今與本府同城似可不必另建等語應如該撫所請將知府等官添設衙署飭令地方官酌量間數據實確估詳細分晰造冊具題到日再議至蒲澤二州改州爲府應設學宮該撫既稱原有州學不必另建亦應如所請毋庸另行建造又疏稱取進童生名數均應照舊不必另添府額俟人文加盛之日另行酌議題請等語查山西蒲州澤州舊額取進文武童生各二十名今該撫疏稱將蒲澤二州陞州爲府取進童生名數均應照舊不必另添府額俟人文加盛之日另酌議題請等語應如該撫所請仍照舊額取進文武童生各二十名其補廩出貢亦照州學舊例遵行又疏稱所有學正應請改爲教諭應將蒲澤二州學正准其改爲教諭新設府縣應交與內閣選擬佳名恭請欽定等因於雍正六年四月初二日奉旨依議澤州添設縣名鳳臺縣欽此

官於濟野限於端緒各鳳臺縣地

楚安善因於癸五六年四月二日奉

其如為煉儲儲道訊錄與內閣錄卦各恭請

又疏錄取不學五親請如為煉儲訊錄戰二州學五卦

步文庭道主各二十各其前與出貢亦與他事書附錄行

詳請寬免舊糧闕丁

沁水令 于繼善 東阿

為避血哀鳴亟救殘黎以保巖疆事沁邑蕞爾彈丸災稜三
載人民逃徙地土荒蕪所剩焦黎膏枯脂竭其災荒情形曾
經潞安府劉知府驗明在案查沁水額賦一萬九千五百餘
兩三十年錢糧民欠七千餘兩三十一年錢糧民欠一萬八
千餘兩又兼借賑分貯之米石五千亦須秋後補還况原額
人丁八千有餘今已逃亡三千六百四十五丁人逃地荒錢
糧何出更有運送漕糧之累驢騾夫役之派又欲運草束於
雲中解匠夫於右衛筑筑子遺支持無策卑職蒞任四月日
擊心傷多方勸諭僅將本年正供於現在人戶力徵二千二
百兩解交司庫其餘正在催比但逃亡丁糧毫無可抵雖三
十一年民欠蒙准寬至十月全完然一年而徵三年之課一

丁而賠數丁之徭災民拮据實難徒加敲扑無益切思錢糧
重要關係考成在卑職下吏微員固不足惜而百姓艱難困
苦情實可憫卑職到任之始已將地方疾苦申詳上憲值前
院告致離任未經題請幸逢新院撫治三晉共仰二天伏乞
憲臺軫念叠荒垂憐重困格外施仁轉申院司倘蒙恩賜題
請或寬或蠲俾殘黎得解倒懸而卑職亦感同再造矣

詳請緩徵舊賦

沁水令 趙鳳詔 武進

爲瀆陳民瘼懇恩安全事沁邑叠遭旱蝗瘟疫人民逃散地
土荒蕪流離困苦之狀屢經前令于繼善署令章尚策備詳
憲臺在案無庸更置喙於其間但卑職甫入境時身歷村鎮
目擊情形見有頽垣破舍蕩然無存者有戶口寥寥家徒壁
立而釜甑生塵者有沿途乞食鵠面鳩形環向而涕泣者蒿
目傷心繪圖難盡至本月初三日蒞任隨有城鄉士民數十
人匍匐哀號皆以賠累難支連名呈控乞詳憲請蠲卑職謬
膺縣令凡民間疾苦敢不詳明以仰副上憲愛養殘黎之至
意案查康熙三十年錢糧民欠七千三百餘兩三十一年錢
糧民欠一萬七千八百餘兩又有借賑倉米五千石除三十
二年未完現在徵比外兩年積欠累萬盈千一旦欲責之現

在之里甲一戶而賠數戶之糧一丁而完數丁之額糶糶子
遺僅存皮骨有瘡須補無肉可剗恐已逃者裹足弗前荒原
如故而現在者潛身遠遁熟產俱荒是不可不爲之早計也
况沁邑丁徭較他邑更重逃亡幾半賠累實難且此地山野
崎嶇田畝硤瘠又不比別縣產硝出鐵稍有生財之策卽歲
獲屢豐僅足下供饘粥上納錢糧一遇饑荒而民已告困矧
茲頻年災稜其何以堪若一歲而並徵數年一人而併徵數
項其包賠貽累誠有如前詳所云者又無俟卑職之贅陳也
近蒙憲示康熙三十年三十一年未完錢糧與夫借賑米石
另行詳議深仁厚澤千載一時卑職業經大張曉諭宣布憲
恩邑中殘遺父老無不感而欲泣但未奉明文里民不無觀
望卑職雖竭力招徠盡心撫恤而下吏微員空言何補合無
詳請憲臺將兩年舊欠作何設法帶徵每年應徵銀若干限
幾年內全完卽徵之里甲里甲亦易於代賠而逃戶聞風不
招自至如此則地丁不致缺額國課不致虛懸一轉移間而
國計民生均爲兩便伏望憲臺軫念殘黎哀憐特疏具題倘
邀
皇上浩蕩洪恩盡行蠲免皆出憲臺格外施仁闔邑官民生
生世世戴德無窮矣

詳免協濟雲中草束

趙鳳詔

爲急請不敷草束等事案查採辦草束事關軍需豈容刻緩
隨撥役分頭採買飛運雲中何敢遲延取咎但沁邑疊遭荒
疫人民死亡逃竄者十去六七所存殘黎皆屬筋疲力盡久
在憲臺洞鑿中如目今草束一項日夜購求百呼不應卑職
隨親歷村鄉家諭戶曉徒見室如懸磬野無青草其崎嶇鳥
道中所生皆蓬蒿荆棘無可供畜牧之資卽向隣邑採辦而
原領價外所費更須加倍念此寥寥孑遺其舊賦新糧尚難
措納若又催比草束民更難堪卑職輾轉躊躇計無所出倘
責之里下民不聊生出之正供又無項開抵捐之於官俸薪
有限一捐亦不能再捐沁邑官民惟有束手待斃卑職卷查
大兵需用草豆甚多等事案內大同府詳稱大同饑饉採辦

維艱故令南府協濟今雲中豐熟有年或就地採買或協運於隣近州縣似無不可如沁邑距雲計程一千五百餘里且災稔頻仍瘡痍未起幸荷憲恩軫恤請賑請蠲此真憲臺曲體小民之艱苦無不周詳則運草一項或可邀恩免解以甦涸鮒者也卑職非不知遲悞軍需致干未便然馬駝之軍需百姓亦朝廷之赤子如必使遠民協運以供芻秣則廩有肥馬野有餓莩能不惻然况康熙三十二年採買草束已不啻一而再再而三矣今羽檄星馳日不暇給災黎萬難支應除將二次三次採買運解外合無詳請憲臺垂念下邑殘黎將四次未完併此後應辦草束檄發附近州縣買運沁邑暫行停止實無損於兵馬大有益於窮民誠爲兩便倘蒙俯允闔邑生靈皆感頌二天於無旣矣但卑職何得以一邑之苦妄開梗令之端竇因地方起見有豐歉不同故冒昧瀆陳恩出上憲非卑職所敢擅便也

再應撫軍檄條議利弊

趙鳳詔

爲諮詢利弊共襄治理事職一介書生五年俗吏謬叨百里
冀展寸長謹備陳事宜四款爲憲臺陳之一可徭之重累宜
變通也沁邑向遭兵燹土曠人稀明季丁額七萬四千四百
一十八丁徵徭銀六千一百八十八兩零國初額丁四萬一
千八百八十一丁而徭銀止減百兩有奇今則以八千九百
一十八丁均徭銀六千六百三兩五錢五分零晉省通例減
丁不減銀丁愈減則徭愈重而民日益困乃沁俗復執里頂
里甲頂甲戶頂戶之說不容彼此轉移如某戶開除必須某
戶頂補倘戶有十丁九丁死逃又無新丁報補卽以一丁而
供九丁之徭戶絕則累甲甲絕則累里其丁強丁壯之家又
以戶無缺額匿不舉報貧民因有成例吞忍賠累莫敢過而

問焉卑職於上年奉文編審力除錮習將闔邑之丁通融計
算有丁者儘報無丁者儘除通縣共豁除死逃人丁一千七
百三十七丁俱報現丁補額從前包賠苦累自此亦稍減矣
雖然賠丁之累固重而現丁之累亦不輕也虛懸之丁幸免
於前而實在之丁難保其後也查沁邑徵徭定額下中則每
丁徵銀九錢五厘零下下則每丁徵銀六錢八分以一州四
縣較之惟此爲甚卽以通省九十七州縣較之亦莫此爲甚
沁邑錢糧不滿二萬而丁銀乃浮於三分之一且有地者不
盡有丁而有丁者半皆無地就使一人止辦一丁較之他邑
不啻倍蓰嗟此窮黎地無立錐安能當此重役也三晉人民
總屬憲天赤子自必一視同仁卑職知而不言是負憲臺愛
養斯民之至意矣不揣冒昧縷悉瀝陳仰祈憲臺詳察顛末

繕疏入 告或酌晉省之通額哀多益寡均得其平或照東
南之通例丁隨糧轉各從其地在國賦原無虧損而減一分
則民受一分之惠生生世世俱感戴二天矣如以徭額久定
成例難更亦望電飭霜批嗣後編審俱通盤酌算核實增除
永杜從前陋弊則徭無缺額丁無鬼名是亦救弊之一策耳
一里甲之地畝宜盡一也竊照各省均田之法總計通邑田
糧均爲若干里又以一里田糧均爲十甲地畝悉合均齊糧
差自無偏累版籍旣經畫一催科亦易稽查法甚善也沁邑
則不然有一里而糧止數十金者有一里而糧至千餘兩者
有一甲而田止數十畝者有一甲而田至數十頃者且或十
甲之中僅存數甲或十甲之外重立甲名皆由貧戶逃亡富
室吞并子姪親族田連阡陌不肯散歸他甲因設立前後大

小某甲之號而空缺之甲終無頂補多寡參差弊端叢集今欲釐剔其弊非均田不可或者曰糧從地辦卽地有不同而糧無偏累庸何傷竊以爲不然古制每里十甲挨次輪當里長奔走輸將歲無暇日十年一轉週而復始如一里不足十甲則未及十年而又再役矣若一里不止十甲卽已過十年而未必再役也且或一甲而止數戶則十餘年而卽人人輪遍矣或一甲而止數十戶卽百餘年而未必人人輪及也更可慮者里長催糧數少則足數甚易咸思急公以息肩催糧數多則足數甚難遂至慢延而積欠民力不均國賦不完職此之故卑職深悉弊端亟思變法因衆議阻撓未能更改僅於僉報里長時將單丁獨戶免其輪役丁少戶弱併合朋黨雖補救目前終非久遠之計伏乞憲臺飭行均田之法俾

里甲整齊錢糧畫一豪強不得兼并奸胥不得混用則各里偏肥偏瘠之病其可免矣一匠價之包賠宜便定也本縣額設匠價銀三十四兩二錢照舊籍匠戶七十六名每名徵銀四錢五分自明季年間迄今年代久遠其匠役子孫或改圖別業或遷徙他鄉或死亡故絕按籍則有其戶索戶則無其人舊額虛懸里民賠墊由來久矣卑職逐戶稽查詢問里老俱稱包賠遺累已經數十年衆口僉同真知確見一邑如此通省可知特以格於成例未敢冒昧瀆詳今蒙憲臺諮詢利弊是晉民再造之日也伏查江西省匠班銀兩俱於地丁錢糧內均派帶徵浙省亦照江右事例題請改歸地丁項下刊載全書永爲定例今晉省匠價賠累與江西浙江無異相應詳請憲臺通行確查或照兩省現行之例均入丁田帶辦或

令本省現業之匠頂補舊額徵輸總使匠價不致虛懸則里民永無賠累是否可行仰候電裁一私鹽之情罪宜分別也查律內凡買食私鹽者杖一百因而貨賣者杖一百徒三年又貧難軍民將私鹽肩挑背負易米度日者不必禁捕律例開載甚明近見潞澤等處人民貧難度日每挑負私鹽以圖易米多者二三十觔少者十餘觔四五觔不等行至卑縣地方多被商人巡役盤獲在該商認地銷引責有攸專查拿固不爲過但念窮民犯禁罪無可恕情有可原一經拿獲招報最輕亦擬杖折贖其蠅頭微利所獲無幾鹽既入官罪又須贖窮且益窮殊爲心惻卑職未吏奉行不敢姑縱伏祈憲臺揆情論罪分別重輕除馱載私販及挑擔成羣者仍照例擬罪外果係貧民易米免其贖罪仍將鹽贖報解充餉則私鹽自不敢橫行官鹽自不至壅滯而窮民戴德非淺鮮矣以上四條祇就臆見率陳如有可行惟願採擇焉

條陳編審陋弊

趙鳳詔

為請定編審等事竊照五年編審上關國家版圖下計閭閻戶口非實心釐剔加意興除則豪猾欺隱漏籍窮黎苦累賠差宿弊相仍比比皆是幸遇憲臺福曜照臨惠風翔洽今當編審屆期嚴飭印官實心奉行毋許借端派累里民致干功令煌煌憲諭其愛民至意誠詳且切矣卑職又何庸瀆請獨是沁邑賦輕役重土曠人稀明季丁額七萬四千四百一十八丁徵徭銀六千一百八十八兩零國初額丁四萬一千八百八十一丁而徭銀止減百兩有奇今則以八千九百一十八丁均徭銀六千六百三兩五錢五分八釐零晉省通例減丁而不減銀愈減則徭愈重而民力益絀且丁從戶起非由地辦有丁者未必皆有地有地者未必盡有丁更有田連阡

陌之家膂力方剛而未充丁數者有地無立錐之子襁褓未脫而卽辦丁徭者有綿綿巨族數人而朋一丁之差者有筭筭子遺一人而頂數丁之額者弊俗因循改絃非易窮簷苦累弛擔無期就使他方有司實心奉行或阻於極重難返之勢或格於一成不變之例仰屋竊嘆莫可如何職蒞事日久稔悉弊端若知而不言是負憲臺軫恤斯民之心矣謹縷悉條分爲我憲臺陳之一曰捏報鬼丁之弊一曰漏脫壯丁之弊一曰此里彼里不容轉移之弊一曰官名乳名互相朦混之弊夫編審開除老故定例也乃沁邑舊規以額不可缺必有頂補方許開除以致耄耄猶懸丁額孀嫠亦代夫征甚至名登鬼籙尚陳王會之圖亦有夢杳熊占先掛公甸之籍鬼名纍纍空缺紛紛按冊則姓名俱有點丁則踪跡全無間里

之包賠無從控愬公庭之徵比何處追呼民力不均國賦難辦實由於此則捏報鬼丁之弊宜除也若夫十六成丁例應開報獨沁民視報丁爲畏途籍口於李代桃僵之說豪強玩法隱匿奸猾巧圖詭避其里長戶頭亦扶同隱匿值審丁之時有畏後患而不畏官法者諺云若報一丁差便入萬年財言非無意情有可原殊不知脫漏戶口律有明條卽本戶無丁可除亦當報增舊額豈本身成丁現在竟容版不書名况丁存本戶徭屬本丁旣非甲冠乙戴有何李代桃僵則漏脫壯丁之弊宜清也至於里有大小甲有強弱戶有衆寡總屬共井同鄉並無此疆彼界乃沁俗偏執里頂里甲頂甲戶頂戶之議不容彼此變通如某戶開除必須某戶頂補倘戶有十丁而九丁死逃又無新丁增補卽以一丁而供九丁之徭

戶絕則累及本甲甲倒則累及本里彼丁強丁盛之家借紳
衿爲護符視桑梓如秦越其戶無缺額匿不舉報編氓因有
成規吞聲忍氣莫敢過而問焉斯民敢怒而不敢言有司能
言而不能行依樣葫蘆虛應故事上負國典下辜民望編審
之謂何乃審不實審而編僅虛編耶則此里彼里不容轉移
之弊宜亟爲釐剔也他如丁冊不書官名而書乳名則更可
異焉官名猶易於稽查乳名不難於影射或父兄係白丁而
子弟爲青衿則籍名頂冒妄希優免甚且冒認伊子爲父更
替乃弟爲兄止圖一時欺罔不顧五倫顛倒小人干名犯義
乃至於此若不加確查恐狡黠之徒指鹿爲馬百弊叢生何
所底止則官名乳名互相朦混之弊宜永爲杜絕也以上諸
弊通省類然沁邑爲甚職早夜躊躇思一救弊之法惟有以

闔邑現在之人充闔邑實在之丁均算變通衰多益寡有丁
者儘報無丁儘除則民間不以報新丁爲苦而以除故丁爲
樂從前捏報漏脫等弊自皆令行而禁止矣然又恐法立弊
生則更當杜法中之弊竊以爲除丁宜嚴勿使小人有賄賣
冒免之倖報丁宜寬勿使庶人有竭盡無餘之憾臨審編時
須爲民節用其不墜不擦不除之戶口槩免親身到官以省
百姓往來之費旣審編後須當官核實其或上或中或下之
門則斷勿假手胥吏以防一時竊換之奸至一切需用紙張
俱令印官捐給諸凡攢造冊籍總於里民無擾是則立法無
弊惟在乎奉行者之以實心行實政也職於康熙三十五年
奉文編審不避嫌怨力除錮習將闔縣人丁通融酌計共豁
除死逃人丁一千七百三十七丁俱報現丁補額積年宿因

一旦稍減但恐虛懸之丁幸免於前而實在之丁難保其後
仰望憲臺電飭霜批嗣後編審俱通盤均算核實增除永杜
從前習弊則徭無缺額丁無賠差於國計民生非惟小補云
耳職叨宰沁邑止應在沁言沁第見晉省之丁差俱重審編
之積習相沿故不得不統言時弊瑣瀆憲聽倘蒙恩賜通飭
祛數十年之陋例救億萬姓之生靈則編戶審丁五年一舉
而洪恩浩澤千載一時矣巡撫嚆批仰布政司確議速報布
政使司滿看得編審人丁乃上關國課下係民生誠鉅典也
凡躬膺斯任者各宜矢公潔已實心奉行務期徭役均平方
不負斯鉅典值今編審之期惟恐宿弊未除業經屢蒙憲臺
嚴批通行飭禁在案茲據沁水縣具詳編審各款并請通飭
祛除剴切條陳復蒙批司確議誠憲臺爲國爲民之盛心也

本司遵查該縣所稱捏報鬼丁等款實通省之積弊均應如
其所請通飭各州縣衛所矢公矢慎將從前老故盡行開除
現在新丁毋許漏脫如有一人而包納幾戶或數人而朋納
一丁悉行清釐改正冊內俱註現在官名將鬼名乳名盡行
除去仍將審定現在人丁通盤均算核實增除貧者擦則富
者墜科不得拘泥舊轍仍踵里頂里甲頂甲之陋習倘州縣
等官不實力清編或借端科派或擾累窮民一經本司察出
定行從重揭叅庶從前之積弊可除而豪強不能隱占貧弱
可免包賠國賦民生均有攸賴矣相應詳覆合候憲臺批示
以便通飭可也巡撫嚆批據詳沁水縣趙令條陳編審捏報
漏脫及不容轉移互相朦混各款俱切中三晉積弊仰司卽
通飭各該府州縣衛所確加體察如果有前項弊端卽爲公

矢慎實力剔除毋致虛應故事總期於國賦無虧民生有裨
不許豪強隱占亦不許印官籍端滋擾如敢故違定行叅究
通取遵依報查仍檄知沁水縣遵照繳

永禁惡習文

惡習有關生命詳請勒石永禁文康熙四十三年八月澤州
知州陶自悅詳稱澤州惡習相沿每遇天旱見有人家婦女
或墮脫而形骸未全或生產而下地無氣卽名之爲早魃遠
近村民號召羽黨羣將產婦擡置空所散髮袒胸輒用冷水
澆淋呼爲龍母令其承認何時有雨到村之時合家逃避折
屋毀牆無所不至新產婦自水淋之後奄奄微喘多致斃命
甚至訛言某家丟棄嬰孩不察果否亦不由分說立時聚衆
橫行夫天災流行何地蔑有愚民惡習殊堪髮指若不嚴行
禁止不特人命攸關抑且天怒實甚因擬比例如產婦水淋
不死止將爲首爲從之人分別枷責如果因此受傷致成殘
廢篤疾以至于死者比照律例下手者擬絞監候原謀與爲

從者分別杖流係已經報明在官立案者按律擬罪至有拆房毀器等情依律從重問擬蒙山西巡撫噶飭行該州如詳立石通衢敢有違犯從重懲處決不寬貸

山西澤州爲欽奉

上諭事雍正三年七月十三日蒙 巡撫伊勒圖設普濟育嬰
一二堂一案澤州遵查卽建設二堂首倡捐銀一百兩備買
薪米藥料等項延請醫生來應承并遴選勤慎鄉約趙永
金等四名經理其事凡有老疾無依之人收養其內於雍
正二年十月工完收養老幼無依有疾窮民王民俊等一
十八名口議立條規男婦隔別分居每口日給三食各與
菜蔬按時授食冬寒給以綿衣疾病用藥調治如有病故
捐給棺木收瘞不致失所其育嬰堂已顧乳母宋氏等按
日給以工食在內守候俟有遺棄嬰孩收入哺養隨經出
示勸募好善之人共成義舉有原任江南和州知州衛樞
貢生呂從誨樂善好施捐助銀兩并勸募闔州紳士有願

樂助者陸續捐輸公議呂生協同老成鄉約共勦其事並無借端強派情弊再查州西司有基地一十三畝一分南壇地七畝五分四厘西壇地八畝六分七厘東壇地五畝四分演武場地七畝五分共地四十二畝二分一厘皆屬官地相應充作公項入普濟育嬰二堂永遠各半收租以供需用仰請憲臺俯賜轉詳批示勒石以垂永久卑職當益加鼓勵實力奉行務期久遠使無依老幼之民永沐皇恩憲德于無涯等因蒙批即便遵照施行蒙批勒石間又續查出附城臨池週圍共有官地七十四畝二分前任佟牧于康熙五十八年賞給平川廂等六里地方耕種似非所宜卽如澤州坊廂里都共一百五十一里服役皆同何乃此六里地方獨得其利乎相應統入普濟育嬰二堂永遠併收租每歲可得租穀二十餘倉石庶收養窮民之需不致缺乏豈非公以濟公也續詳遵批擬合一併立石以垂永久雍正三年八月澤州知州劉毓崑奉檄立石

之十三終

澤州府志卷之四十三

經籍目

哀經籍志為一弓志目也唐四庫書目宋崇文總目目存
 而書亡者多矣以為害已也而去之以為愧且畏也而焚
 之日之不存籍亦罔據於去與焚也等茲澤一隅宋劉義
 叟氏元郝經氏著書目具在也而書多若存若亡於陵川
 集苦意搜求邑令林君學普曲訪始鈔得之况遠在前古
 哉今載記前賢所著書用以存禮也先宋元尊經

宋

劉義叟易春秋論又春秋災異

歐陽修繳進春秋災異狀辭章精博學識該明議論

有出于古人文字可傳于後世

元

郝經易外傳又太極演原古錄抄京費諸家要撮春秋外

傳論次章句音義共八卷比類條目十二卷三傳折衷五

十卷

宋劉義叟十三代史劉氏輯曆唐書律曆志唐書天文志五行志

元郝經續後漢書九十卷又刪注二子玉衡貞觀行人志陵川集

唐韓昱壺關錄三卷太行山人韓昱壺關錄一卷記李密事李翰張巡秘閣傳二卷張中丞外傳二卷裴約言靈異志五卷

宋李異切韻門庭王雲鷄林志三十卷又戴斗奉使錄二卷宋太初簡譚三十八篇王載道鹿臺詩卷

晉王叔和金匱玉函八卷脈經十卷脈訣四卷脈賦三卷孩子脈論一卷脈訣機要三卷張仲景藥方十五卷又傷寒卒

病論十卷金匱要略方三卷

金晁會元水集秦志林泉集二十卷李宴游仙野人集禁庭制作集趙可玉峯散人集李俊民鶴鳴老人集

元郝天挺集注唐人鼓吹集雲南實錄五卷張翥忠義錄樂府三卷張起巖韓維學元水倡和集

明楊繼宗龍岩集常倫校正字法一篇韓肫仁養中養才類編白所學平陽府志語叢平水雜組白所知醒

心錄白所蘊闇修錄北牕瑣言陳炳琴竹山房詩畢璽石屏文集石屏詩集家乘錄李灝郊西吟稿成

惠人赤虬草劉虞夔日錄問見十卷穀語二十卷中和堂稿段正介菴集栢臺公案諸程日記宦遊記韓范

經世集要司馬紀畧司空紀畧黃芩吟本支世系圖考

都永思王子集 張毓中青寫軒詩 王國光萬曆會計

錄司農草司銓草率意稿 沁水王朱瑄堦衡漳稿又滄

海披沙集 郭整一泉稿 裴宇內山稿 栗魁周陽城

志秦中詩文集 蔡勳綠葉堂文集 張銓春秋集傳勝

游草國史紀聞 董緒白鶴集 張慎言泊水園集 張

履旋靜音堂詩集 郭鑿翰林詩國學文集居家文字

丁伯通綱目續編又州志十卷 鍾鑑禮經主意 裴騫

滁陽集薊門集 孟霽詩紀集 周盤古文襍集奏疏

賈之鳳兩山房詩 賈之鵬綠含齋草 賈之龍怡園草

楊鵬翼底山草圃亭詩集 衛吾良義經精解 翟學

程奏疏襄事錄三卷 王道六泉集 李萃秀醉笑軒集

孫居相南北臺奏疏維風約藝林伐山集 孫鼎相承

恩堂遺稿 王崇銘松石齋詩 吳天澤南游草謹存草

原體蒙析山詩鈔 尚寧一修齋格言一百卷女則五

卷 徐應奎清居博採集 李培秀孤山問業集 羅人

文醫案十卷

國朝畢振姬尚書注四州文獻三川別誌西北之文西河遺

教 白孕謙學言二卷祭約一卷東谷集歸庸齋集二卷

白孕昌蘇譚容安齋文集蓼解叢編醫砥醫約醫源醫

彙各十卷 楊時化蘋閣集 苗胙土中丞集解鞍錄

石鳳臺西池集逸齋集秦楚隴上詩 白象顯帝王年曆

陽城詩續鈔懷觀堂文集 白方厚尋樂集崇志堂稿

張璿按蜀稿巡淮撫秦奏疏 喬映伍白巖山房集 王

克生懷古堂集 衛貞按吳疏採風吟閒閒草 崔子明

經國大業集丹頭地集省身錄讀書聲 張鎰史臆晉南

名賢傳 張道湜史鑑節錄 白方鴻少谷集 白方熙

止齋詩 成端人青蓮館詩 牛兆捷博韓集陶史草十

卷 衛立鼎約齋文集輦下吟漫堂和詩 田六善奏議

鷓棲幔坡集拾瑀錄樂泌樓詩 陳昌言述仙草山中集

斗築居稿 陳廷敬午亭文編五十卷歸去集二卷 張

茂生息齋集丁丑集 田從典堯山集四卷 陳弘度雪

篁草 張文炳麋田草 陳豫朋濂村詩鈔 陳壯履南

垞集 張澤中敦宿齋詩 衛振輝認齋詩 田宅中種

書堂集自艾齋詩 張顯在茲堂詩 石博琨園集 白

象級古崖草 張蘊生來青軒詩 王甸遠心齋詩 陳

煥醉雲齋詩 王璋方山閣詩 梁悌玉成集 苗時雍

燕居錄登仕錄 武文周四書大全質疑 趙日輝語錄

孝經集說 張肇昌定堂稿 張肇暉古天洞叢桂莊諸

稿 陳廷統鎮尊邊防未議 陳廷弼清田錄 張璉遠

言舜澤記 張聯璧愛吾廬稿 樊度中圃餘集 張德

渠南華道德經解南村文集

卷之四十三終

焚與中園繪集
 刻蘇漢散田繪
 東華郡古天風
 畫卦其繪
 大全寶錄
 鐵日戰雷繪

澤州府志卷之四十四

金石錄

金石不朽也有時而亦朽有朽之者而不朽者亦朽自有其不可朽則朽之者窮以故得金石不朽不得金石亦不朽朽不朽不在金石矣雖然金石在天壤猶與故紙爭修短爪剔偏傍夜把點畫得讀者常十五六不朽者仍不朽也郡邑碑石所在多有不朽而朽者無論姑存目錄朽與不朽都任之

澤州府廟學宋大觀元年徽宗大觀聖作之碑 元褒封大

成至聖文宣王碑 聖父叔梁紇加封啟聖王聖母顏氏啟

聖王夫人姜氏特封文宣王夫人碑 褒封顏子充國

復聖公會子郈國宗聖公子思子沂國述聖公孟子鄒國亞

聖公之碑 元丙午李俊民重修廟學記 至正元年郡人

白處善修廟學記 宋兩程先生祠堂記碑元郝經撰 澤

州重修廟學記明張養蒙撰 重修澤州廟學記正德庚辰

張鵬撰 創建聖謨閣記明吳駟撰 澤州儒學設立學田

記碑明孟霏撰 重修澤州文廟碑知州官于宣撰 體仁

書院碑邑人陳廷敬記 元忽必烈大王示李俊民令旨五

道 李俊民鶴鳴堂記義豐楊杲撰 明洪武三年頒行學

校格式 禮部頒示生員不許建言事理卧碑十二條 嘉

靖頒宋儒程氏四箴注范氏心箴注 七年刊布四箴心箴

上諭四道 嘉靖九年刊布正孔子祀典記 正孔子祀典

說 頒示祀典記說後上諭一道 正德四年諭山西提督

學校勅文一道 五年勅諭教條碑記學正谷遷撰 嘉靖

二十七年重修廟學碑郡人雁浩撰 重葺學宮記萬曆四

十六年呂純如撰 重修學宮記郡人周盤撰 國朝順

治十三年澤州重修廟學記巡按御史高爾位撰 順治十

六年重修廟學落成記郡人張京撰 康熙三十八年文昌

閣五奎樓重修碑記知州倫可大撰 儒學申明學田碑天

啟六年知州范之齊記 儒學義粥濟饑碑崇禎十三年郡

人程式孟記 應試諸生俱從提學考試入場正德六年學

使陳鳳梧題 申明射禮事碑嘉靖三十六年學使陳棐題

勸俗二則萬曆二十九年學正江恒心述 國朝順治

九年示生員卧碑八條 康熙四十一年禮部頒 御製訓

飭士子碑文 雍正三年平定青海告成太學碑 重修

天井關夫子廟堂記元大德四年學正劉德盛撰 廟祀給

本息記大德十一年劉德盛撰 重增本息記元統二年教授徐亮撰 重修夫子廟碑記至正四年白處善撰 修大成殿記至正十二年山長牛麟撰 修天井關回車廟上梁文嘉靖庚戌隰川王書 夫子廟堂記唐駕部郎中程浩撰 嘉靖三十年陳棐重鐫石 孔子回車廟解鄆陵陳棐撰 重修天井關孔子廟碑嘉靖年郡人孟霽記 重修天井關聖廟碑賀盛瑞撰 國朝順治十二年內外重修孔廟碑記高都郭應昌撰 重修迴車嶺文廟碑順治十二年御史馬鳴珮撰 迴車廟碑記康熙二十年督理林廟家務孔衍珣撰州守王國輔立石 重修天井關文廟碑康熙四十九年州守姚時起撰 大陽鎮重修宣聖廟記正德三年郡人裴爵撰 修先師孔子殿記天啟五年郡人田近撰 城隍

靈佑侯碑洪武二年知州李祥撰 澤州城隍廟像記正統四年浚儀趙冕撰 壽靈佑侯碑嘉靖二十年郡人張巨弼記 城隍廟寢宮碑嘉靖二十四年郡人閻昺記 修城隍廟碑萬曆九年張巨弼撰 國朝康熙二年重修澤州城隍廟碑知州景文魁撰 修城隍廟碑康熙四十二年知州倫可大記 康熙四十七年重修城隍廟碑郡人王廷掄記 府署內奉國上將軍南澤州刺史左泌德政碑金皇統三年河陽令程莘撰 創建敬慎堂記元至正八年義安處士白處善撰 洪武三年新建譙樓記訓導鄭可權撰 澤州重建廳事碑成化八年淳安商輅記 正德元年澤守崔公哲去思碑關中李居仁撰 澤倅劉鍾英祈雪有感碑正德十一年邑人丁伯通記 弘治九年澤守李侯去思碑彭鸞

撰 澤守汲郡陳侯奎去思碑成化十二年學正汪雲撰

澤守喬祺政績記嘉靖壬辰楊謨撰又燕谷政績二十二節

桐城齊侯遇政績碑嘉靖丁巳郡人郭整撰 重修澤州

公堂記嘉靖戊戌知州汲郡張相撰 澤州廳壁題名記嘉

靖六年侍郎沁水李瀚撰知州王朝雍立石本朝建官一百

六十年得一百一人 嘉靖十二年王郡守去思碑孟春撰

高郵張知州道德政感應記嘉靖二十四年郡人龐浩撰

澤守露潭邱公碑嘉靖三十八年參議孟霖記 李倅禱

雨有感記嘉靖三十二年奉國將軍聰滿撰 王侯好學德

政記嘉靖四十二年孟階撰 郡守壽光李侯去思記長平

趙軌撰 萬曆二十三年許郡守去思碑沁水孫居相記

大堂銘萬曆二十八年知州馮瑗撰 訓廉謹刑約言萬曆

四十二年直指李若星撰發 崇禎二年龔南道頒定舊額

造辦胖襖畧 國朝康熙二十二年知州三韓王國輔重

建大堂碑記 龔南道王公肇生平寇碑邑人張慎言撰

澤州守所用王使君祠堂碑張慎言記 香爐山創建普同

塔碑成國佐記 郭峪義塚碑銘陳廷敬撰 康熙四十三

年陶知州自悅為惡習有關生命申詳立石永禁碑 試院

布政司公署碑萬曆九年知州于達真記 練國事澤署阻

雨詩碑 呂純如澤潞校士還省詩碑 東萊王肇生陽城

紀事諸詩碑 孝昌傅淑訓校士高都追憶舊游詩碑 淵

中韓炳衡對竹詩 宛亭徐謂弟初秋詩 九河劉梅松竹

詩 傅淑訓環秀軒二詩 中美于漢翔仲夏來瀨澤詩

天泉汪灝四友堂詩 靜海勵宗萬高都途次詩碑 郡城

南關重修白水河橋記碑嘉靖二十三年郡人三谷鍾錫撰

澤州始修北城樓碑記隆慶四年郡人孟雷撰 康熙五

十八年知州佟國瓏重修北城樓碑 康熙五十九年元夕

北城燈火堆金會記 府署賓館碑一師六友圖說中規矩

準繩權度也 身家盛衰循環圖 理欲生長極至圖 白

菜說皆萬曆己卯抱獨居士呂坤撰萬曆庚戌澤州知州鄭

際明重刻 敬慎堂四檜說萬曆己丑學正郭顯文撰

鳳臺縣宋宣和四年勅賜旌忠廟裴約特封忠烈侯牒文澤

州刺史許安仁書跋金明昌五年立石 宋晉城縣令題名

記碑程明道先生題撰 宋宣和六年知澤州軍陳仲孫祭

忠烈侯碑文 澤州龍堂記宋天聖九年安國軍節度掌書

記夏侯觀撰 宋大觀三年權通判軍州事許奉世篆書龍

泉二大字碑 郡守晏知止遊峽石福巖院碑記宋元豐八

年晉城令衡規書 金明昌六年郡守許安仁福巖院詩碑

崇壽寺新修三門記金天會八年高平令朱紱撰 碧落

寺碑金明昌五年刺史許安仁記並書 明昌五年刺史河

南許安仁旌忠廟詩碑 金大定十七年輔國將軍福巖院

祈雨碑 元至正二十三年五龍宮感應之記邑人劉貫撰

福巖院重修法藏記至元二年邑人賀祿撰 重修成湯

廟碑銘至元二年郡人李彬撰 元泉寺佛殿記至正四年

郡人裴士議撰 元至正癸未重建義勇武安王廟碑 元

妙觀文昌祠碑至正二十七年河東張衍記 元至正知州

葉企顏重修旌忠廟碑記 重修元妙觀上帝殿碑明正統

九年邑人臨溪李泰友記有宋政和七年蔡京書額 元妙

觀三清殿碑正統十四年會稽吳駟記 隆慶六年建拜殿
 碑郡人吳自省記 元妙觀重修鐘樓嘉靖十三年郡人裴
 騫撰 黃籙大殿碑崇禎十一年郡人程接孟撰 元妙觀
 關侯祠碑崇禎九年邑人朱弘祚記 重建玉皇廟記成化
 二年郡人苗顯撰 萬曆己未創建漢張閔中王廟碑 重
 修招賢館碑萬曆三十三年郡人林一桂記 顯慶寺藏經
 記嘉靖十五年郡人李黼撰 重修普覺院碑天啟六年桐陽
 衛一鳳記 晏公廟碑萬曆四十三年王國聘記 小析山
 成湯廟記嘉靖二十四年郡人龐浩撰 青蓮寺下院古淨
 影寺碑萬曆元年郡人孟顏記 三元廟關門碑嘉靖年鐘
 鐔記 重建玉皇廟成化二年苗顯記 重修勝因寺碑萬
 曆九年張巨弼記 玉皇廟神樓碑天順三年會稽沈日禎

記 八蜡廟碑崇禎乙亥 重建太和宮碑萬曆五年知州
 吳思學記 創修三官廟碑崇禎十五年程接孟記 重修
 高臺寺碑天啟五年宗室中尉俊櫟撰 天啟丙寅重修高
 臺寺碑郡人韓尼記 營建善定寺正德年郡人丁伯通撰
 碧落寺創建西閣記嘉靖十四年張宗儒撰 重修碧落
 寺佛殿碑萬曆十年郡人司其秀記 碧落寺石橋記萬曆
 二十八年郡人張養蒙撰 石佛谷治平院碑弘治壬子法
 眷記 重建地藏殿碑天順六年府判韓璟記 洞陽山乾
 明寺碑嘉靖十三年裴騫記 正德六年聖樂寺碑 正德
 七年聖公寺碑 弘治十四年雙林寺碑 犁川鎮玉皇廟
 碑萬曆三十二年侍郎孫光祐記 北山鎮天啟元年修元
 帝廟碑 北大社重修唐李衛公廟碑天啟三年賈復初記

冶底村正德七年重修東岳廟碑 堰頭村萬曆五年重

修三官廟碑楊孔登記 周村鎮成化八年重修迎祥觀碑

李村永樂甲申建太清觀碑 陽阿鎮建三峻廟碑孟顏

記 大箕村正德七年重修玉皇廟碑 南關東嘉靖庚戌

建昭惠靈顯王大殿碑 嘉靖丁酉馬匠社玉皇廟碑 萬

曆丁酉浪井村重修李衛公神祠碑 岳神山興善寺碑正

德十三年丁伯通撰 崇禎四年知州王孕長祠堂碑 重

修諸葛武侯李衛公文丞相三忠廟碑崇禎八年王知年記

國朝順治三年修建南關元帝廟碑邑人王弘記 順

治十七年重建五龍宮碑長平王璉撰 康熙八年龍華寺

塔院碑尚書白孕謙記 法像堂碑康熙七年恒山石明允

記 大陽小析山取水記康熙十九年邑人都廣祚撰 西

街重修玉皇廟碑康熙五年知州景文奎記 白雲廂高禩

祠碑 重建大佛殿碑康熙四十七年郡人衛呈圖記 犁

川玉皇廟神路碑順治九年廣陵陳卓記 太行山小口康

熙四十七年創建關侯廟設立茶湯碑記 康熙二十九年

重修晏公廟碑 重修元妙觀碑康熙五十年訓導朱之鳳

記 康熙五十八年修建護國寺碑將軍宗室賜德尊五撰

重修興善寺碑康熙十三年魚山陳昌期撰 五龍山水

簾洞石殿廟碑記邑人陳壯履撰 順治六年袁公報恩祠

碑記 重修吳神山吳泰伯廟碑邑人劉振甲記 景德廂

王公孕長祠堂碑記崇禎四年 迎恩廂王公肇生祠碑廢祠

王光祿祠堂碑記康熙五十九年知州佟國瓏撰 設立普

濟育嬰堂養給地畝碑雍正三年知州劉毓岳記 秋木王

氏城東修路碑記知州佟國瓏撰 雍正十年知府許日熾
移建關侯廟三代祠並創建鳳臺縣署碑記 雍正十一年
建關侯廟春秋閣碑知府許日熾撰 創建鳳臺縣署內碑
雍正十年邑令羅著藻撰 元妙觀大定乙酉洛陽吳鶴雪
中過寒碧軒訪潛叟道人詩碑 元妙觀鐘樓懸後唐李嗣
昭龍興寺所鑄鐘鐘上有銘爲嗣昭祈福卽開元寺鐘 上帝殿
前石壁題名朝拜時庚因按部至此九大字政和三年澤州
司士曹事李倪摹勒上石 觀中有吳道子祠祠側石刻吳
生老子出關小像 石壁題名郡守王元舜弼倅崔順孫毅
夫再遊崆峒觀琵琶泓前隰守劉程公範同至巡警馬誠之
慎思郡幕劉行之行中民椽陳諤昌武法椽鄭珣君瑞邑尉
黃叔敖嗣深從紹聖丁丑歲乙巳月丁亥日舜弼題

高平縣令明濟移丹河碑唐貞元七年武少儀記 宋奉議
郎高平令張持摹唐吳道子畫孔子魯司寇時小影於廟壁
元祐七年持記 宋元豐提刑學士黃廉勸學詩碑 金皇
統元年邑令王庭直省冤谷掩幣碑 明萬曆三十七年骷
髏廟碑教諭王興記 元延祐七年邑人宋翼米山宣聖廟
碑記 重修高平縣儒學碑明正德癸酉李遜學撰 弘治
乙卯浙東王守仁建尊經閣記碑 改正蒙社爲晉城書院
碑嘉靖十三年姜潤身撰 正德十年重修程子祠碑記提
學張璉撰 建寧鎮楊公去思碑正德八年崔銑記 重修
程明道先生祠嘉靖十七年邑人郭荃撰 重修高平縣學
碑嘉靖三十七年郭荃記 定林寺上黨劉龍米山鎮修垣
牆記碑 萬曆二十八年先後甄甃城垣碑邑人郭東記

明邑宰李禎高平治西向日軒碑記 明萬曆五年重修預備倉碑劉崇文記 重修演武亭邑人劉虞夔撰 萬曆十三年創建南察院碑邑人郭嗣煥撰 萬曆十三年增修城隍廟碑邑令楊應中撰 萬曆三十二年建空倉嶺城堡州守賀盛瑞撰 萬曆三十三年邑令王公省身去思碑邑人馮養志撰 國朝順治七年重修高平縣學碑邑人李棠馥撰 康熙六年邑令侯模創修丹河石堤碑邑人李棠馥記 重修敬一亭碑邑人畢振姬撰記 康熙十三年建伯方社倉約碑邑人畢振姬撰 三壇碑康熙十三年邑人畢振姬撰記 康熙三十三年邑令柯貞幹重修東關炎帝廟碑記 康熙四十七年邑令梅建宗程書院碑記 王河村重修五龍廟邑令黃永耀記 雍正元年增修丹河石堤碑

邑人牛道遠記 雍正十年重修通濟橋碑邑人牛道遠記

雍正十一年重修骷髏廟碑邑人李耀傳記 雍正十二

年重修城隍廟碑邑人李耀傳記 宋河東轉運使兵部郎

中孫冲長平懷古詩碑 河東提刑祠部員外郎朱正辭長

平詩碑 宋天聖九年刑部員外郎杜衍長平詩碑 重修

長平驛記碑明弘治六年邑人郭芝撰 重修長平驛碑成

化十三年邑人常振撰 修長平驛記畧嘉靖己丑知縣儀

封張鹵 長平懷古詩碑景泰年廬陵蕭啟 呂純如長平

弔古詩碑 峯山鄭旻宿長平驛詩碑 正德丙寅馮清長

平弔古詩碑 李禎次長平薛文清詩碑 濟南于達真骷

髏廟詩碑 終南胡希頴長平弔古詩碑 重修城隍廟碑

康熙元年邑人畢振姬撰 遊仙寺碑金故李文簡六世祖

通敏嘗隱居於此因名 準提菴縣丞龍眠倪灝詩碑 長
 平弔古西吳卜汝梁詩碑 定林寺少司馬李棠馥弟李棠
 薛倡和詩碑 瑞雲觀碑 明邑令王省身去思碑張養蒙
 撰 明邑令楊子器去思碑崔銑記 明邑令任大僚興學
 記陳國柱撰

陽城縣宋政和六年封析城山神為嘉潤公勅書碑 明創
 修廟學碑宋訥記 修縣學碑王國光記 重修縣學碑邑
 人白孕謙記 重修文廟碑邑人田六善撰 唐司空圖靈
 泉禪院碑記 後唐明宗賜靈泉寺僧洪密詔書碑 萬曆
 乙未重修靈泉寺碑白所知記 重修陽城城隍廟碑明張
 慎言記 陽城科貢題名記碑嘉靖年三原馬理撰 陽城
 義士八量上海表間碑嘉靖壬寅光祿卿馬理記 新苑陽

城縣甄城碑記明于達真撰 新築甄城碑萬曆五年邑人

王國光撰 陽城縣除荒救民碑邑令李繼白記 元關邑

令世傑德政碑邑人衛元凱撰 明邑令楊縉德政碑忻州

潘高記 邑侯李棟祠堂碑王國光記 潤城鎮李侯棟生

祠碑邑人張昇撰 明邑令王雅量德政碑白所知記 劉

邑令應奇生祠碑白所知記 明邑令王良臣去思碑邑人

李春茂記 邑令安神生祠碑白所知撰 邑令李繼白去

思碑邑人喬映伍撰 石少叅鳳臺里人頌德碑白孕昌記

國朝順治十五年析城山新廟記碑白孕謙撰 重修

三靈侯合祀碑白孕謙記 黃叔敖許端卿同游海會院元

符元年十二月二十日題名 東海許守謙海會寺詩碑泰

和乙丑 金大定元七年李晏同何慮楊之休鄭暉劉廷彥

海會寺詩碑 重修太清觀記 己丑前進士李俊民撰 宋

翔霄崇慶癸酉詩碑 明成化二十一年棲龍池禱雨感應

碑 成化乙巳邑令劉嵩棲龍池禱雨記 萬曆庚子潘王

衡漳居士龍泉寺詩碑 嘉靖丙寅可樂山人王國光詩碑

隆慶二年重修塔記侍郎王國光撰 隆慶四年王國光

古詩碑 隆慶五年關中張元善詩碑 萬曆庚申宛邱徐

貞夜宿龍泉寺詩碑 南皮李騰鵬海會寺登塔詩 萬曆

乙酉關中趙爾守詩碑 嘉靖戊子郡守王朝雍詩碑 嘉

靖貞子潼谷王三省詩碑 嘉靖庚寅沁水石樓李瀚詩碑

嘉靖甲申李瀚同陽城王令士廉游海會寺詩碑 隆慶

壬申關中李禎詩碑 萬曆五年環州蓋甫詩 鄆陵陳斐

詩碑 萬曆丁丑濟南于達真詩碑 嘉靖乙丑順陽少莊

李藜詩碑 天啟元年西極文翔鳳龍泉行碑 萬曆甲戌

踈菴王國光遊靈泉寺詩碑 唐先清道人扇面詩碑 萬

曆庚辰王國光臨澗寺詩碑 崦山白龍廟王國光詩 王

國光過白巖寺詩 萬曆庚辰王國光游仙人洞記並詩洞

在縣西南七十里 邑人衛貞龍巖寺二僧合傳碑 西神

菴香林偈碑 天啟二年邑令俞時九女臺詩碑 國朝

順治十三年東谷白孕謙過龍泉寺舊讀書處詩碑 順治

戊戌邑令鄴下夢沙李繼白龍泉寺詩碑 關西楊素蘊詩

碑 康熙己酉白孕謙開福寺碑 白孕謙鐵盆嶂詩碑

縣東十二里中南山蘆花頂五花宮圖記碑 城西南土地

祠杭昌潘元鼎古檜歌碑 白方熙象顥鐵盆嶂詩 康熙

甲戌陳廷敬鐵盆嶂詩碑 陳廷敬棲龍池詩碑

陵川縣重修廟學碑記明天順三年河東薛瑄撰 新遷廟

學碑記隆慶庚午知州顧顯仁撰 國朝順治十六年陵

川廟學碑提學錢受祺記 重修聖廟記知縣黃國璨撰

改建學宮記碑康熙十二年知縣孫必振撰 改建奎樓記

碑孫必振撰 郝文忠公碑大德三年閻復撰 宋太平興

國九年勅賜陵川聖公山崇福禪院碑 大中祥符元年聖

公山崇福禪院碑銘 金大定三年龍嵩寺碑記 金貞元

三年古賢寺彌勒佛殿碑 南吉祥寺碑元至治三年教諭

牛克明記 崔府君廟碑明洪武三年訓導魯邦泰撰 八

蜡廟碑記正德五年陵川令張溥撰 寶應寺碑正德丙寅

沙門劫空記 宗一山華巖寺碑記正德十六年立石 北

吉祥寺碑成化十四年立石 興福寺碑成化十六年建

真澤二仙行宮感應碑萬曆己卯石城許穀記 修建鳳山

諸神祠碑嘉靖壬寅教諭南陽李邦詹記 重修陵川縣城

隍廟碑記萬曆十三年訓導上黨牛廸吉撰 重修太清觀

碑萬曆三十一年邑人王敷典撰 崇安寺佛寶舍利來源

錄碑萬曆四十一年澤州判官崔莆記 重修吉祥寺碑嘉

靖三年空同王道撰 崇安寺碑天啟四年李萃秀記

國朝康熙八年龍王祠碑邑人馮魏記 修孫公路路碑記

康熙九年邑人陳廷敬撰 重修關侯廟碑記康熙十八年

高平畢振姬撰 鳳山道院記縣令瑯琊孫必振撰 創修

水口碑記邑令穎川張琦撰 陳太守堠子山倡和詩碑山在

寶應寺西南 澤州司馬劉鐘英遊崇安寺倡和詩碑 縣令遼

陽孫盤去思碑弘治丁巳邑人王昺記 嘉靖年任邱袁令

遺愛碑祭酒崔銑記

萊陽孫令紹先遺愛碑郡人周盤撰

安塞馬令如龍去思碑萬曆十五年邑人郭東記 馬宗

孝劉汝江二侯去思碑萬曆二年太常卿郭東記

沁水縣廟學重修碑記明大學士楊一清撰 正德癸酉邑

令王溱修縣治碑記景暘撰 聖天寺碑宋建隆四年澤州

司法參軍范鉅撰 龍泉寺碑金大定七年大榮記 葆和

觀碑元大德十年長平宋景邦撰 三清觀碑元至正十四

年李志金撰 重修碧峰山靈泉寺碑記明隆慶二年邑人

衛天民撰 重修法隆寺碑嘉靖九年邑人李瀚記 石堂

村石佛寺碑隆慶五年翼城侯九臣記 重修聖天寺碑嘉

靖三十五年邑人李春芳記 聖天寺佛像記嘉靖二十五

年裴字撰 扶龍寺碑弘治十二年寺僧性宗抄記 石聖

寺碑天啟元年邑人李之藻記 中村廟兵荒碑崇禎十五

年諸生王夢震記 白雲寺重修記永樂初寺僧一峯立石

重修長栢村正覺寺碑弘治十二年陽城張紀撰 鬼山

寺碑成化十五年沁水鄧時忠記 蒲洲里福勝寺碑萬曆

二年邑人張之屏記 惠濟寺佛像碑成化二年苑馬寺主

簿郭贊撰 惠濟寺碑記嘉靖二十六年僧人清碧撰 重

修惠濟寺碑嘉靖三十九年邑人趙大倫記 松山龍泉寺

碑成化三年邑人丁伯通撰 龍泉寺碑嘉靖三十七年李

從高記 鹿臺山香巖寺千佛殿記碑萬曆十二年邑人李

尚周增建 鹿臺倡和詩碑邑人李瀚王溱陳鰲 遊鹿臺

山記元儒王秋澗讀書處 端氏鎮德勝寺碑嘉靖十四年

晉城孟春記 端氏三老堂記嘉靖甲午年為喬太宰白巖

孟少宰遲齊李司徒石樓南京吏部尚書上黨劉龍撰 端
氏鎮湯王廟碑記萬曆二十二年邑人郭士英撰 端氏鎮
重修文廟記關中張元善撰 勅賜明行寺碑嘉靖三十三年
邑人常儲撰 鐵佛寺碑晉川劉東星記 重修元真觀
碑嘉靖九年邑人李瀚記 靈虛觀三清殿記弘治七年道
人王洞巖修 靈虛觀重修王帝殿碑記萬曆癸巳陽城王
國光撰 玉皇廟碑萬曆六年邑人劉東星撰 西里曲建
關侯祠碑明張五典記 國朝順治年補修沁水縣城來
脉碑記張道湜撰 聚奎三賢侯碑記陳弘度撰 明邑令
楊鎮原祠堂碑張慎言記 重修沁水縣廟學記趙鳳詔撰
厲壇碑趙鳳詔記 重修東岳廟碑趙鳳詔記 改濬城
池碑記趙鳳詔撰 長平驛北門外畢堅毅先生德義碑

凡得見者如前文卽不盡收載其目庶野廟叢祠靈旗社
火民生日用飲食之情亦不泯焉至各邑民人開呈碑摹
悉詳畧不倫有詳其所不必詳有畧其所不可畧甚至立
石歲時撰人姓名多無所考據其他不得見者又不知凡
幾矣不得已記載錯落亦槩從畧匪類傳疑實一手足之
力所不得到也

卷之四十四終

澤州府志卷之四十五

文

戰國

馮亭以上黨入趙

戰國策

秦王謂公子地曰昔歲殺下之事韓為中軍以與諸侯攻秦
 韓與秦接境壤界其地不能千里展轉不可約日者秦楚戰
 於藍田韓出銳師以佐秦秦戰不利因轉與楚不固信盟唯
 便是從韓之在我心腹之疾吾將伐之何如公子他日王出
 兵攻韓韓必懼懼則可以不戰而深取割王曰善乃起兵一
 軍臨滎陽一軍臨太行韓懼使陽城君入謝于秦請効上黨
 之地以為和令韓陽告上黨之守斬黈曰秦起二軍以臨韓
 韓不能支今王令韓與兵以上黨入和於秦使陽言之太守

太守其効之靳黈曰人有言挈瓶之智不失守黑王則有令而臣失守雖王與子其亦猜焉臣請悉發守以應秦若不龍卒則死之韓陽趨以報王王曰吾始已諾於應侯矣今不與是欺之也乃使馮亭代靳黈馮亭守三十日陰使人請趙王曰韓不能守上黨且以與秦其民皆不欲爲秦而願爲趙今有城市之邑七十願拜納之於王惟王才之趙王喜召平陽君而告之曰韓不能守上黨且以與秦其吏民不欲爲秦而皆願爲趙今馮亭令使者以與寡人何如趙豹對曰聖人甚禍無故之利王曰人懷吾義何謂無故乎對曰秦蚕食韓氏之地中絕不令相通故自以爲坐受上黨也且夫韓所以內趙者欲嫁其禍也秦被其勞而趙受其利雖強大不能得之於小弱而小將顧能得之强大乎今王取之可謂有故乎且

秦以午田水通糧其死士皆列之於上地令嚴政行不可與戰王自圓之王大怒曰夫用百萬之衆攻戰踰年歷歲未見一城也今不用兵而得城七十何故不爲趙豹出王召趙勝趙禹而告之曰韓不能守止黨今其守以與寡人有城市之邑七十二人對曰用兵踰年未見一城今坐而得城七十此大利也乃使趙勝往受地勝至曰敝邑之王使使者臣勝告太守有詔使臣勝謂曰詩以三萬戶之都封太守千戶封縣令諸吏皆益爵三級民能相集者賜家六金馮亭垂涕而免曰是吾處三不義也爲王守地不能死而以與人不義一也王內之秦不奉王命不義二也賣王之地而食之不義三也辭封而入韓謂韓王曰趙聞韓不能守上黨今發兵已取之矣韓告秦曰趙起兵取上黨秦王怒令公孫起王齎以兵過

趙于長平 史記七十城作十七城

魏

白起降趙卒論

何晏

白起之降趙卒詐而坑其四十萬豈徒酷暴之謂乎後亦難以重得志矣向使衆人皆豫知降之必死則張虛拳猶可畏也况于四十萬披堅執銳哉天下見降秦之將頭顱似山歸秦之衆積骸成邱則後日之戰死當死耳何衆背服何城肯下乎是雖能裁四十萬之衆而適足以強天下之戰欲以要一朝之功而乃更堅諸侯之守故兵進而白伐其勢軍勝而還喪其計何者設使趙衆復合馬服更生則後日之戰必非前日之對也况今皆使天下爲後日計乎其所以不敢復加兵于邯鄲者非但憂平原之補直患諸侯之捄至也徒諱之

而不言耳若不悟而不諱則無所謂遠智也可謂善戰而拙勝長平之事秦民之十五以上者皆荷戟而向趙矣秦王又親自賜民爵于河內夫以秦之強而十五以上死傷過半者此爲破趙之功小傷秦之敗大又何稱奇哉若後之役戍不豫其論者則秦衆多矣降者可致也必不可致者本自當戰殺不當受降詐也戰殺雖難降殺雖易然降殺之害禍大于劇戰也

唐

晉文公守原議

柳宗元

晉文公旣受原於王難其守問寺人勃鞞以畀趙衰余謂守原政之大者也所以承天子樹霸功致命諸侯不宜謀及媒近以泰王命而晉君擇大任不公議於朝而私議於官不博

謀於卿相而獨謀於寺人雖或衰之賢足以守國之政不爲
敗而賊賢失政之端由是滋矣况當時不乏言議之臣乎狐
偃爲謀臣先軫將中軍晉君疏而不咨外而不求乃卒定於
內豈豈可以爲法乎且晉將襲齊桓之業以翼天子乃大志
也然而齊桓任管仲以興進豎刁以敗則獲原啟疆適其始
政所以觀視諸侯也而乃背其所以興跡其所以敗然而能
霸諸侯者以土則大以力則彊以義則天子之冊也誠畏之
矣烏籠得其心服哉其後景監得以相衛鞅宏石得以殺望
之誤之者晉文公也嗚呼得賢臣守大邑則問非過問舉非
過舉也然猶羞當時陷後代若此况于問與舉又兩失者其
何以救之哉余故著晉君之罪以附春秋許世子止晉趙盾
之義

天井關迴車聖廟碑

夫子廟堂記

一作皮日休

駕部郎中

程

浩

天地吾知其至廣以其無不覆載日月吾知其至明以其無
不臨照江海吾知其至大以其無不容納料廣以寸管測明
以尺圭航大以一葦廣不能逃其數明不能私其質大不能
亡其險偉哉夫子後天地而生知天地之始先天地而沒知
天地之終非日非月光之所及者遠不江不海濶之所浸者
博三代禮樂吾其損益百王憲章吾其消息君臣以位父子
以親家國以和鬼神以饗道不可筌其有物釋未可證於無
生一以貫之我先師夫子聖人也古之帝聖者曰唐古之君
明者曰禹唐之德有時而息禹之功有時而窮我夫子之道
久而彌芳遠而彌光用之而昌舍之而亡昔否于宗周今泰

于皇唐不然何耀袞而裳垂珠而王者矣

上李司徒澤潞用兵書

杜牧

伏覩明詔誅山東不受命者廟堂之上事在相公雖樽俎之謀算畫已定而賤末之士芻蕘敢陳伏希赦其狂愚一賜聽覽某太和二年爲校書郎曾詣淮西將軍董重質詰其以三州之衆四歲不破之由重質自誇勇敢多算之外復言其不破之由是徵兵太雜耳徧徵諸道兵士上不過五千人下不至千人旣不能自成一軍事須帖附地主名爲客軍每有戰攻客軍居前主人在後勢羸力弱心志不一旣居前列多致敗亡如戰似勝則主人引救以爲己功小不勝主人先退至有殲焉初戰二年以來單則必勝是多殺客軍及二年以後客軍單少止與陳許河陽全軍相搏縱使唐州軍不能因雪

取城蔡州事力以不支矣其時朝廷若使鄂州壽州唐州祇令保境不用進戰俱用陳許鄭滑兩道全軍帖以宣潤弩手令其守隘卽不出一歲無蔡州矣今者上黨之叛復與淮西不同淮西爲寇僅五十歲破汴州襄州襄城盡得其財貨輸之懸瓠復敗韓全義於殷上多殺官軍四萬餘人輸輦財穀數月不盡是以其人味爲寇之腴見爲寇之利風俗益固氣焰已成自以爲天下之兵莫我與敵父子相勉僅於兩世根深源濶取之固難夫上黨則不然自安史南下不甚附隸建中之後每奮忠義是以鄭公抱真能窘田悅走朱滔常以孤窮苦寒之軍橫折河朔強梁之衆貞元中節度使李長策卒中使提詔授與本軍大將但軍士附者卽授之其時大將來希皓爲衆所服中使將以手詔付之希皓言於衆曰此軍取

人合是希皓但作節度使不得若朝廷以一束草來希皓亦必敬事中使言面奉進旨只令此軍取大將授與節鉞朝廷不別除人希皓固辭押衙盧從史其位居四潛與監軍相結超出伍曰若來大夫不肯受詔某且勾當此軍監軍日盧中丞若肯如此此亦固合聖旨中使因探懷取詔以授之從史捧詔再拜舞蹈希皓四揮同列使北面稱賀軍士畢集更無一言從史爾後漸畜奸謀養義兒三千人日多煦沫及父處死軍士留之表請起復亦只義兒與之唱和其餘大將王翼元烏重孕第五釗等及長行兵士並不同心及至被擒烏重孕坐於軍門喻以禍福義兒三千一取約束及河陽取孟元陽爲之統帥一軍無主僅一月日曾無大吠况於他謀以此證驗人心忠赤習尚專一可以盡見及元和十五年授與劉

悟時當幽鎮入覲天下無事柄廟算者議必銷兵雄健敢勇之士百戰千功之勞坐食租賦其來已久一旦黜去使同編戶紛紛諸鎮停解至多是以天下兵士聞之無不忿恨至長慶元年幽鎮乘此首唱爲辭昭義一軍初亦鬱噉及詔下誅叛使温起居造宣慰澤潞便令發兵其時九月天已寒四方全師未頒冬衣服聚之授詔或伍或離垂首強項往往碎語及温起居立於重榻大布恩旨并疏昭義一軍自七十餘年忠義戰伐之功勞安史已還叛逆滅亡之明效辭語旣畢無不懽呼人衣襁褓爭出效命其時用兵處處敗北唯昭義一軍於臨城縣北同果堡下大戰殺賊五千餘人所殺皆樓下步射搏天飛者賊之精勇無不殲焉賊中大震更一月日田布不死賊亦自潰後一月其軍大亂殺大將磁州刺史張汝

因劫監軍劉承偕盡殺其下小使此實承偕侮媒一軍侵取
不已張汶隨承元出於鎮州久與昭義相攻軍人惡之汶既
因依承偕謀欲殺悟自取軍人忌怒遂至大亂非悟獨能使
其如此劉悟卒從諫求繼與扶同者只鄆州隨來中軍二千
耳其副倖賈直言入責從諫曰爾父提十二州地歸之朝廷
其功非細祇以張汶之故自謂不潔淋頭竟至羞死爾亦孺
子安敢如此從諫恐悚不敢出言一軍聞之皆陰然直言之
說值寶曆多故因以授之本纔二十餘歲風俗未改故老尚
存雖欲劫之必不用命伏以河陽西北去天井關強一百里
關隘多山井不可鑿雖有兵力必恐無功若以萬人爲壘下
室其口高壁深塹而與之戰忽有敗負勢驚洛師蓋河陽軍
士素非精勇戰則不足守則有餘成德一軍自六十年來世

與昭義爲敵訪聞無事之日村落隣里不相往來今王司徒
代居反側思一自雪况聯婚戚願奮可知六十年相仇之兵
仗朝廷委任之重必宜盡節以答殊私魏博承風一當效順
然亦止於圍一城攻一堡刊木堙井係累稚老而已必不能
背二十城長驅上山徑擣上鄙其用武之地必取之策在於
西面今者嚴紫塞之守備謹白馬之隄防祇以忠武武寧兩
軍以青州五千精甲宣潤二千弩手由絳路直東徑入不過
數日必覆其巢何者昭義軍糧盡在山東潞澤兩州全居山
內土瘠地狹積穀全無是以節度使多在邢州名爲就糧山
東糧穀旣不可輸山西兵士亦必單鮮擣虛之地正在於此
後周武帝大舉伐齊路由河陽吏部宇文弼曰夫河陽要衢
精兵所聚盡力攻圍恐難得志如臣所見彼汾之曲戍少山

澤州府志 卷之四十五
平用武之地莫過於此帝不納無功而還後復大舉竟用改
計遂以滅齊前秦苻堅遣將王猛伐後燕慕容暉大破暉將
慕容評于潞州因遂滅之路亦由此北齊高歡再攻後周路
亦由此而後名將韋孝寬齊王攸常鎮勳州玉壁城故東西
相戕每由此路以古爲証得之者多以某愚見不言劉禪終
不能取貴欲速擒免生他患昨者北寇才畢復生上郤頰相
公妙算深遠北寇卽日敗亡倘使北寇至今尙存沿邊猶須
轉戰回顧上郤豈能計除天下雖言無事若上郤久不能解
別生患難此亦非細自古皆因攻伐未解旁有他變故孫子
曰兵聞拙速未睹巧之久也伏聞聖主全以兵事付於相公
某受恩最深竊敢干冒威嚴遠陳愚見無任戰汗某頓首再
拜

賀中書門下平澤潞啟

杜牧

某啟伏以上黨之地肘京洛而履蒲津倚太原而誇河朔戰
國時張儀以爲天下之脊建中呂田悅名曰腹中之眼帶甲
十萬籍土五州太行夷儀爲其肩關健馬強兵爲其羽翼自
逆黨專有僅及一世頗聞教育實曰精強昨者凶豎專地之
請初陳聖主整旅之詔將下中外遠邇皆疑難攻蜂螞螳蝦
頗亦自負伏惟相公上符神斷潛運廟謀仗宗社威靈驅風
雲雷電掌上必取穀中難逃纔逾周星果梟逆首周公東征
之役捷至三年憲皇淮夷之師尅聞四歲較虜寇之強弱曾
不等倫考攻取之敗亡何至容易若非睿算英畧借箸深謀
比之前修一何遠出自此鞭笞反側灑掃河湟大開明堂再
振儒校窮天盡地皆爲壽域之人赤子秀眉共老止戈之伐

其謬分符竹實由恩知慶快歡忭之誠倍百常品不宣

移丹河記

武少儀

局平古泫氏邑也其沿代改名圖經詳矣初相地而居之蓋以土厚水深爲善農鑿井而飲者則以穿壤剖石爲艱故千家之中數井而已縷以遠引而多絕瓶以難升而驟羸則雖有端賜之機智無施其巧捷雖有管寧之仁惠無杜其忿鬪况牛馬俟乎滿腹必遵乎千里之河而瓜蔬期乎給口常望一旬之雨朝夕勞苦歲時饑饉可勝道哉嘻凡爲前弊滋久終俟後賢乃革不然者豈子男百輩而莫之是恤貞元七年潞州屯留令平原明濟受連帥相國大司空義陽王李公之命假領茲邑撫安疲黎其清勤簡惠不異于屯留之政政可知也下車之日咨訪故老問人疾苦僉曰公之主也俗詠其

蘇矣惟水之歉詎敢求救于公耶明侯聞之若疚于心且形于色曰夫窮必有泰固常理也此豈無望前或未思吾將退而慮之由是發智周之妙躬循郊原目究川谷度高下之勢相引決之宜有丹水者始自縣之西北山源高而派平可議壅以導明侯載審厥事將利于人乃下謀于鄉耆次白于郡守上言于節制才獲所請爰減其功乘井稅之暇俟農桑之隙先儲乎薪芻之物次具乎畚鍤之器然後量工命日使里人樂助競子來而展力故不更于素窀其有成始瀦流而爲潭因疏渠以遶郭築防以補其陷隳剝木以道其險阻脉分枝散貫邑周閭瀰瀰苔草之間陰陰槐柳之下遂使家開沼沚戶植芰荷濫觴可以寄傲垂釣可以烹鮮豈直豐畦圃之沃灌恣問開之飲濯路有奉漿之義井爲應及之泉人無荷擔

之勞畜無奔走之困而已也復于潭側特建水祠列樹敞亭
別成佳境將俾水依神而永久人賴水而無極庶功用不再
且祈報有歸焉明侯覩夫衆情之欣洽足以閑居而賞玩化
鳥之餘閱王鳧之雙飛臨堂之際調宓琴而合響不其美爾
君子曰政無大小以勤民爲良事無工拙以利物爲貴如明
侯者實兼而有之其由我大司空義陽王以至公且明推獎
而致此者矣余偶以行役經過于斯耳聆嘉謠目覽異績緇
黃耆艾因請余以紀事余誠忝跡于文者姑具述義王之德
舉明侯之善亦何辭焉是則勉而志之貞元建

宋

孔子畫像記

張持

唐吳道子畫孔子爲魯司寇時像二本乘車而群弟子從者

謂之圖立而顏淵侍者謂之小影司門郎中王伯瑜傳小影
於仙源孔氏蓋孔子四十七代孫襲封衍聖公蒙之所藏也
傳於棣州摹石於學中世人畫宣聖往往訛謬不足考信此
小影與今朝廷詔其家獻秘閣者乃此本也是知無妄矣其
石後有東武趙挺之所題聖人旣不得而親見之矣今誦其
書考其行事而又刻其衣冠與夫儼然盛德之容日夜想像
而潛心焉持承乏高平邑人興建學校患無真容以爲憂棣
州教授袁百之偶以寄此上下悅之若合符然乃示工者法
以像之別摹於石以安廟壁庶傳無窮也元祐三年九月二
十五日奉義郎權知澤州高平縣事兼兵馬都監飛騎尉賜
緋魚袋張持記

宋尙書省牒澤州旌忠廟

王孝迪

禮部狀承勅吏部尚書王孝迪劄子奏臣聞天下之大閑忠義是也忠則秉心常不欺義則臨難毋苟免人主所以維持國家賴此而已比者盜發東南震驚赤子武林重鎮望風奔潰無復古人仗節捐軀之氣臣謂褒崇忠義以勸方來正當今之急務也謹按五代史裴約以裨將爲莊宗守澤州方李繼範據上黨叛約嬰城固守誓不從賊力屈勢窮卒被屠戮歐陽修嘗謂吾於五代得全節之士三人約其一也後唐迄今二百年幸逢明聖咸秩無文之世而名未編於祀典澤之士民相與築室而祠之規撫庠陋識者興歎臣愚望聖慈特降睿旨委自漕臣量支繫省錢增廣祠宇明詔太常揭美名以寵之仍舉侯爵加焉載之祀典俾歲時省祭有司奉牢醴以從事豈獨慰英靈於九泉庶幾厲風節于百辟天下幸甚

取進止

宋宣和四年五月勅曰朕惟率世厲俗之制爲政所先仗節死義之臣前時罕見昔有其士今而進封庶盛恩榮鼓舞幽顯惟爾生於五季仕專一方崛然擾攘之間奮以精忠之節視彥章而克壯配仁瞻而用光有司遺文久稽典祀錫之侯爵賁以嘉名豈惟慰一郡之心實以垂千古之訓尙其不昧歆此殊休宜特封忠烈侯牒至准勅故牒

宣和間進士浩天澤得前件黃牒以主其祠天澤傳其子進義溫溫傳其甥張淳蓋大定初也至二十八年淳傳其道士郭景昭應衆人請也景昭病其日久湮滅後人不知始封之由求余書斯文于石或曰書勅牒筆吏之事也應之曰使裴君尙在雖執鞭亦願爲之矧能少發其輝光奈何辭焉禮部

澤州府志 卷之四十五
近奉條理典故許引用宋事夫褒崇忠義本朝之急務也士大夫以僞命換官者不可勝計其知它日不因此文俟之增封者耶金明昌五年秋七月十有二日朝列大夫澤州刺史許安仁書附

宣和六年十月朝散大夫知澤州軍州管勾神霄玉清萬壽宮賜紫金魚袋陳仲孫敢昭告于忠烈侯唯公忠義許國仁愛庇民當五代離蕩之際四方擾攘之日偷生苟免見利忘義滔滔皆是如公之節義者幾何人哉公當是時撫有此土干戈攻戰險阻艱難乃能以義自處奮不顧身風聲氣焰與烈日秋霜爭嚴視生如鴻毛重義如泰山名垂史冊炳若丹青逮我皇宋藝祖文宗混一區宇天下太平之日久矣此邦之人思公之功德謂公之生也保衛吾民其精爽在於冥冥

之中豈易其志士民父老相與感泣思欲褒顯成績得以血祀不泯而庇生靈前太守王公孝迪因民所請力言之賜之侯爵旌以忠烈給錢公府建立祠宇後之視事因循歲月凡歷二三年迄未有成仲孫被命于朝方且待次夢寐之間若與神接見委以初未之省及至下車披按公牒仰觀勅旨乃知神異有如此者遂鳩工擇材塑繪廟貌工精其巧民獻其力經始於季春而告成于首冬謹以二十有一日奉神而安之嗚呼國家之於公也若是其厚人民之思公也如是之深黃河之流與公之功共注太行之山與公之名不朽公之英靈節槩復如何哉蓋將佐右國家保安人民與天地無窮日月同輝茲足以荅揚休命公之風義如存庶幾明聽此言

晉城縣令題名記

程顯

古者諸侯之國各有史故其善惡皆見乎後世自秦罷侯置守令則史亦從而廢其後自非有功德者或記之循吏與夫凶殘之極者以酷覓傳其餘則泯然無聞矣如漢唐之有天下皆數百年其間郡牧之政可書宜亦多矣其見書者率纔數十人使賢者之政不幸而無傳其不肖者復幸而得以傳蓋其意與古史之意異矣夫圖治於長久者雖聖賢爲之且不能倉卒苟簡而就蓋必本之人情而爲之法度然後可使去惡而從善則紀綱條教必審定而後下其民之服循漸漬亦必待久乃淳固而不變今之爲吏三歲而代者固已遲之矣使皆知禮義者自其始至卽皇皇然圖所設施則亦教令未熟民情未孚而吏書已至矣儻後人之所至不同復有甚者欲新已之政而盡去其舊則其迹固已無餘而况因循不職者乎噫以易息之政而又無以託其傳則宜其去皆未幾而善惡無聞焉故欲聞古史之善而不可得則因謂今有題前政之名氏以爲記者尙爲近古而斯邑無之乃考之案牒訪之吏民纔得白李君而降二十一人第其歲月先後而記之俾民觀其名而不忘其政後之人得從而質其是非以爲師戒云耳來者請嗣書其次

舉劉義叟劄子

歐陽修

臣昨奉勅差往河東伏見澤州進士劉義叟有純朴之行爲鄉里所稱博涉經史明于治亂其學通天人禍福之際可與漢之向歆張衡郎顛之徒爲比致之朝廷可備顧問伏乞特賜召試或不如所舉臣甘當朝典今取進止

繳進劉義叟春秋災異奏狀

歐陽修

右臣會薦舉澤州進士劉義叟學通天人禍福之際如漢向
歆張衡郎顛之比乞賜召試升之朝廷可備顧問臣今有收
得劉義叟所撰春秋災異集一冊其辭章精博學識該明議
論有出於古人文字可行于當世然止是義叟所學之一端
其學業通博詰之不可窮屈其文字一冊臣今謹具進呈伏
望聖慈下兩制看詳如有可採乞早賜召試謹具狀奏聞
金

重修廟學記

李俊民

郡之廟學舊近市宋至和乙未太守吳中徙焉憫其民之不
喜儒術境內貢舉五六十人無一人登高第者於是聚徒養
士以東里學規教授習俗稍變至元豐乙丑黃夷仲題秦氏
書齋澤州學者如牛毛野處又云長平朱紫半夫三十年間

何作成之遽邪蓋不患民之難化患教養之不至爾金源百
年由學校取士化未純而中原亂貞祐甲戌春天兵上太行
烈焰所焚蕩然一空丙子高鳳議重加修葺幾完而又燬惟
大成殿僅存爲殘民所廬中外荒地鞠爲園蔬矣逮我侯段
公之鎮是邦也蒞政之隙專致力焉去瓦礫剪榛蕪峻以環
堵廢者起之缺者補之廟像之漫漶不鮮者飾之志之所嚮
與古人合昔文翁起學於蜀招下縣子弟以爲學弟子除其
繇役不數年爭願入學富人至出錢以求之蜀地大化後令
天下郡國皆立學自文翁始我侯之首善也豈獨爲一郡一
國立學之始歟安定胡翼之在湖州之學去來者數百人各
以經傳相授以仁義禮樂爲業其教學之法最備後詔州縣
皆立學建太學於京師有司請下湖州取先生法爲太學法

我侯之崇儒也豈獨爲一縣一州教法之始歟田表聖知睦州下車興學表請入紙國子監印經籍以給諸生詔賜之還其紙孰若我侯購求多方私家所藏麾下將佐及趨走吏所得莫不出之又於東萊宋披雲處獲三洞秘書兼收並蓄幾萬餘卷上不煩於官滕元發知鄆州學生食不足民有爭公田二十年不決者公曰學無食而以良田飽頑民乎乃請以爲學田遂絕其訟孰若我侯取附郭田千畝以給之漳源郭資善暨從任南士人玉天與割已業助之下不侵於民王義方在吉安也其民梗悍不馴乃選生徒開陳經書行釋奠禮人人說順我侯之來饗也率僚屬具牲幣遠近學者畢集髫童執禮登降跽立靡不中節觀者異之賢於吉安遠矣常衮在福建也閩人未知學不肯仕宦親加講導歲貢士與內州

等我侯之敦諭舉子就兩府試預選者百二十有二人朝廷命加精進以聽擢用時議許之賢於福建遠矣噫凡人之於事好之而且有力無不遂我侯一舉兼數賢大夫之美力而好之者也多難之世好事者鮮能爲人之所不爲人不以爲汙不待請於上毅然行之人不以爲專先事而後役其功簡其效速人不以爲勞堂筵齋廡庖湏之次儲書之室延賓之位與焉一新制度稱其宜人不以爲侈旣成之後束修子衿鼓篋入學絃誦之聲洋洋盈耳纓冠束衽卒出於戎馬介冑之間其亦太平之象歟我侯戾止樂且飲酒三爵之後有拊楹而歌者曰學之遠如以藏以修學之曠如以息以遊愷悌博雅茲學之化周旋動容此學之風朝於是夕於是揖讓乎其中吾道不窮我侯之功何以報之從記學宮不才閣筆視

久矣聞其歌而說之特書于石以俟木鐸之採焉

析城山重修成湯廟記

李俊民

成湯廟在縣西南七十五里析城山上宋熙寧九年河東路
旱委通判王伾親詣析城山祈禱即獲休應十年五月牒封
析城山神為誠應侯政和六年三月析城殷湯廟可特賜廣
淵之廟為額誠應侯可特封嘉澗公宣和七年重修廟本路
漕司給係省錢命官增飾廟像以稱前代帝王之居而致崇
極之意以其餘材完嘉澗公祠合二廟凡二百有餘楹大金
革命廟止存九間共六十椽大廟壬寅春因野火所延存者
亦廢民間往往即行宮而祭之本縣行宮存郭內東西街北
右去城門百十餘步左距縣衙一里強至大金壬午歷一百
二十八年而毀邑人王元武金王昇張儀王通王漢等雖在

擾攘之際相與鳩工復起正殿三間元帥延陵珍補西廡歲
有水旱疾疫禱無不應民之戴商厥惟舊哉噫神依于人廟
食百世亦豈有升沉時耶抑成壤之數幽顯莫能逃耶何天
甌未悔如此之酷焉僕重過是邑王元等託友人燕子和求
識其始末故書以示之

省冤谷記

王庭直

少讀楊雄書有載長平之戰四十萬人阬死原野厥人之肉
川谷流人之血蚩尤之慘莫過于此余三讀其辭而悲之後
令高平問其自乃古長平也詢其故跡父老曰城西北十五
里有地曰殺谷乃秦將白起坑趙降卒四十萬之所當時頭
顱似山骸骨成邱何晏亦嘗哀悼至唐易名省冤則長平故
事其來久矣辛酉清明日庭直率本土士眾攜酒殺奉香火

張聲樂具服祝謹詣其谷弔以祭之其日陰風襲人寒煙蔽空必有冤魂來享其祭舊宋運判馬城經過此地移檄縣僚收拾遺骸于谷口鑿坑深濶以左右前後溝壑數十里暴露之骼畢集而藏揜仍于所揜之地啟墳祭之使後人不踐履爾今觀其墳已爲姦農所侵僅存數尺而已乃勸鄰農于所占墳地外更四面各廣八步起供堂一所于其上植美木成圍俾永久知所悼惜維有長平鄉老農王姓者告詣去谷十里餘爲雨水所崩岸崖頽裂露骨數車願收而揜之爰卽具禮盡載于墳圍如法安葬細視其跡于長脛骨間存銅漆矢一人骨寸餘因出矢而揜之人骨之堅如此而骨中銅矢尙存慨然發嘆四十萬人于當時解甲歸戈赤身受亂兵殺戮而苦死其冤亦深矣然其骨其矢安得尙存而不朽卽是其

冤抑之氣凝結而不散以至于此也嗟乎白起克狼恃秦軍之強殘無心之降卒其勢亦易矣起直爲此克狼也當年後世又安得而不痛恨哉向使趙卒未降甲戈在體雖在危障中乃死戰之軍力戰未必無生路卽或敗亡未必盡遭此屠也譬猶執羊就機持刀自恃以爲能殺何以異是嗚呼今而後其墳併供堂告成一所見有暴露之骨卽揜其中余不能無望于後之君子皇統改元時六月十三日縣令壽春王庭直記

元

元順帝追封郝經制

鄂渚之役彼因紆難以求和中統之初首議遣書而通好故翰林侍講學士國信使郝經毅然啣命志在息民往諭聖祖

一視之仁卒被僞相姦謀所梗雖蒙假館遂見拘留鴈書未
達于中原龍棹已橫于江上閉儀徵者十六載臣操益堅訖
宋籙之三百年兵端自此甫遂生還之願遽傳哀計之音永
懷忠亮之風宜舉褒崇之典於戲請纓象闕既酌終軍繫粵
之心圖像麟宮式表子卿歸漢之節可贈昭文館大學士資
善大夫諡文忠

追封鄭鼎制

聖祖應千齡之運茲垂裕於無疆人臣宣百戰之勞豈加封
之未至旌其既往沛以殊榮故贈銀青榮祿大夫中書右丞
諡忠毅公鄭鼎偉畧雄才清流宿望書通六籍惟不肆以不
矜劔學萬人亦能仁而能勇慶延其閎閱義著於鄉閭懷昔
賢經濟之謀當羣寇搶攘之際兵符早握驅雷電以蕩餘氛

潛邸從游廓風雲而遇真主始自西羌之役建興南詔之命
志在摧堅涉艱危而不變算無遺策決勝負於必然視長江
若一葦可航歸正統而萬邦順軌招降撫定所去見思賑乏
蘇枯其勤匪懈蕞爾小孽輒畜難圖夫何螳臂之微失我鷹
揚之輔卹章顯謚雖已極於褒崇大國徵畬盍特昭於眷渥
矧其孕續有若忠宣丕昭再世之光俯迪嗣孫之請於戲賢
者識其大者生死之節靡舒有之是以似之熾昌之來未艾
英靈可作殊報是承可贈宣忠保節功臣金紫光祿大夫平
章政事柱國追封潞國公諡忠肅

宋兩先生祠堂記

郝經

國氏而並稱先生何一宋師儒祗程氏二昆焉爾千載而下
聞而知之純誠靜厚盡性知天篤恭徽懿形履實踐含章蘊

道而立極知幾乘化而詣聖振霜風而不稿納萬物於一春
墮乎其順淵乎其奧混涵汪洋不露圭角得顏氏之學學者
宗之明道先生也千載而下聞而知之高明正大獨造自得
窮神知化以道自任憂天下之不行恥一人之不知舉世非
之而學益粹霆碎電折而志益堅滙源委於六經集大成於
一易傳聖之心續道之統得孟氏之學學者宗之伊川先生
也二老歸而周盛兩生去而漢雜五精緯奎天敷文命兩先
生出焉宋道所以昌也初兩先生師事濂溪周子大其學而
倍蓰十百之泛瀾委浸放乎四海百年以來君相士夫國庠
鄉校莫不知爲程氏之學粹然一歸孔孟之正在所祠爲先
師尊其道也河東自唐爲帝里倚澤潞爲重五季以來屢基
王業故其土俗質直尚義武而少文明道先生令澤之晉城

爲保伍均役法惠孤惇革姦僞親鄉閭厚風化立學校語父
老以先王之道擇秀俊而親教道之正其句讀明其義理指
授大學之序使格物致知誠意正心修身齊家篤於治已而
不忘仕祿視之以三代治具觀之以禮樂未幾被儒服者數
百人達乎鄰邑之高平陵川漸乎晉絳被乎太行擔簦負笈
而至者日夕不絕濟濟洋洋有齊魯之風焉在邑三年百姓
愛之如父母去之日哭聲震野金源氏有國流風遺俗日益
隆茂於是平陽一府冠諸道歲貢士甲天下大儒輩出經學
尤甚雖爲決科文者六經傳注皆能成誦耕夫販婦亦知愧
謹詠道文理帶經而鋤者四野相望雅而不靡重而不佻矜
廉守介莫不推其厚俗猶有先生之純焉泰和中鶴鳴李先
生俊民得先生之傳又得邵氏皇極之學廷試冠多士退而

不仕教授鄉曲故先生之學復盛經之先世高曾而上亦及先生之門以爲家學傳六世至經奉承緒餘弗敢失墜嗚呼紹興以來先生之道南矣北方學者惟是河東知有先生焉先生之祠遍于江淮獨不憇食于立政設教之士邪學其學而不知其報享焉豈事師之道哉乃移書澤守段君勗祠于州學以伊川先生配歲時釋菜尊爲先師題曰宋兩先生序其學推本其道使學者知所宗焉祝其澤而詠其淵鬱之久必發之迥異時先生之道未必不復自南而北也

棣華堂記

郝經

郝氏世業儒至先曾大父昆季七人皆治經力學教授州間有聲張徹郝氏益大中堂數楹聚族歌哭之所也諸昆皆賢乃植棠於庭名曰棣華取詩棠棣之華鄂不韡韡凡今之人

莫如兄弟之義也歲時燕集尊卑壯稚比次以序抑然有禮熙然有恩而燦然有文無闕墻反日之私於是家人篤其親國人慕其義道爲人師禮爲人則焉其季年諸孫繁衍冠服異室殆十餘人聚則隘諸堂退則逼諸庭於是有別居之議而先曾叔父東軒老以季弟弗敢違命扳庭樹涕泣不寢食者三日諸兄問之曰吾業儒而爲是何以爲訓終吾世使子孫任爲則吾食矣諸兄從之聚廬同食以終是歲棣華特盛人以爲友愛之瑞焉壬辰之變郝宗殲於許洛之間獨先君以經北渡居於保以有弟妹孫子而郝氏不絕陵川故居獨棣華堂與庭中之棠存豈將使蟬聯華胄穰穰簡簡復其初之盛乎已未夏外伯父牛君視經於曹南言邇年棠華尤爲茂異汝兄弟其興乎故作棣華之詩俾識諸堂且無忘先東

軒老之懿云吾家中堂高壓太行苗彼本枝是聚茲堂堂始
有華實大吾家玉崑峩峩德音莫瑕棠華日馨諸孫盈庭有
華韡韡有衿青青奕厥棟焚鞠爲荒榛棠華弗凋中堂獨存
鵲鳴在原兄弟急難遙遙空堂巋彼高寒鴻雁于飛哀鳴嗷
嗷郁彼先棠芬如李桃惟彼桑梓尙當敬恭况茲庭實祖植
父封爲告鄉鄰勿戕勿剪庶幾遺陰本根不斬經也作頌載
歌東軒嗚呼茲堂道路是傳越千萬年

罪言疏

郝經

竊聞天所畀與而能奉承是謂應天畀與而弗之應是謂棄
天天可棄乎故凡有天下國家者雖一民尺土莫敢忽而不
治非惟應天亦所以奉天也國家光有天下五十餘年包括
縣長亘數萬里尺箠所及莫不臣服惜乎綱紀未盡立法度

未盡舉治道未盡行天之所與者未盡應人之所望者未盡
允也比年以來關右河南北之河朔少見治具而河朔之不
治者河東河陽爲尤甚近歲河陽三城亦在湔濯分裂頓滯
者獨河東而已夫河東表裏山河形勝之區控引裔夏瞰臨
中原古稱冀州天府南面以蒞天下而上黨號稱天下之脊
故堯舜禹三聖更帝迭王互爲都邑以固鼎命以臨諸侯爲
至治之極降及叔世五伯迭興晉獨爲諸侯盟主百有餘年
漢晉以來自劉元海而下李唐後唐石晉劉漢皆由此以立
國金源氏亦以平陽一道甲天下故河東者九州之冠也可
使分裂頓滯極於困弊反居九州之下乎竊惟國家封建置
度不獨私強本幹與親賢共享示以大公旣分本國使諸王
世享如殷周諸侯漢地諸道各使侯伯專制本道如唐藩鎮

又使諸侯分食漢地諸道侯伯各有所屬則又如漢之郡國
爲尊卑相繼強弱相制與衆共有進退比次不敢相踰條貫
井井如農夫之畔分撥公賦使爲私食則亦一代之新制未
爲失也平陽一道隸拔都大王又兼真定河間道內古城等
五處以屬籍最尊故分土獨大戶數特多使如諸道祇納十
戶四斤絲一戶包銀二兩亦自不困近歲公賦仍舊而王賦
皆使貢金不用銀絹雜色是以獨困於諸道河東土產菜多
於桑而地宜麻專紡績織布故有大布卷布板布等自衣被
外折捐價值貿易白銀以供官賦民淳吏質而一道課銀獨
高天下造爲器皿萬里輸獻則亦不負王府也又必使貢黃
金始白銀十折再則十五折復再至二十三十折白銀二兩
得黃金一錢自賣布至於得白銀又至於得黃金則十倍其

費空筐篚之紡績盡妻女之釵釧猶未充數榜掠械繫不勝
苦楚不敢逃命則已極矣今王府又將一道細分使諸妃王
子各征其民一道州郡至分爲五七十頭項有得一城或數
村者各差官臨督雖又如漢之分王王子諸侯各衣食官吏
而不足况自貢金之外又誅求無藝乎於是轉徙逃散帝王
之都邑豪傑之淵藪禮樂之風土富豪之人民荒空蕪沒盡
爲窮山餓水而人自相食始見視諸道爲尊乃今困弊之最
也國家血戰數十年以有此土何獨加意於陝右河南及河
陽置河東而不問坐視其顛連宛轉而不恤獨非國家之赤
子乎是天畀此中土之冠而裂去不受也可乎哉願下一明
詔約束王府罷其貢金止其細分使如諸道選明幹通直者
爲之總統俾持其綱維一其號令輕歛薄賦以養民力簡靜

不繁以安民心省官吏以去冗食清刑罰以布愛利明賞罰以奠黜陟設學校以勵風俗敦節義以立廉恥則分裂者一頓滯者舉九州之冠可正致治之樞可以風四方而動天下克受天之所畀天復萬萬無窮而畀之也經本澤人旅食他方二十餘年不得一拜松楸守先世之敝廬故願治之心比之他人爲尤急天庭遼邈漫爲瞻臆太行山色黯然凋瘁引領翹首望之而已居位操勢有以仁天下者可無意乎此非布衣所當言故援引杜牧之例名曰罪言干冒鈇鉞謹附使者以聞

新修成湯東廟記

宋 翼

陽城漢之濩澤縣也土瘠民淳儉而好禮不經之祀絕而弗尙縣之西南界析城山圖經相傳王禱旱于斯宋熙寧九年

請雨有應宣和七年命有司負而新之故民傲于東西社祀焉兵餘正殿僅存歲月滋久弗除風雨庭宇湫隘且近闐闐曷稱主居至元之廿有二年贈中憲大夫廣東道宣慰使都元帥高平郡公邠州知州鄭甫故金紫光祿大夫平章政事潞國忠肅公之介弟也借耆儒 郁等二十有四人經營進士趙廷式及劉淳等捐廟後隙地而高平公之子中奉大夫廣西兩江道宣慰使都元帥昇霄洎郁之子長日日叅次宣撫幕官汝楫繼志述事倡義戮力剷穢夷高堙塹恢宏棟宇階室之廣三倍厥初以至元二十五年十月望日落成至元貞之元年高平公復捐俸金鳩工召役建戟門三間中奉君時長萬夫鎮武昌大德甲辰二月自鄂以楮幣五百緡俾里人張全成秀元良張通等建析城山神高禰神于翼室泰定

澤州府志
元年甲子君與長平宋翼相遇于京師介鄉儒衛元凱屬文
諸麗牲嗚呼湯見于書經聖人定後世文士豈容置喙于其
間哉故書其實俾以入石云

米山宣聖廟記

宋翼

明道先生歿幾三百年澤潞里館歲昵淫祀而嬉優俗才乏
俗澆識者興歎由金源而來廟僅存者九里而已翼教授懷
孟北歸始記勾要館召爲應奉翰林文字又記釜山館繼爲
修撰又記河西館竊喜吾鄉人士可與爲善復嘆今之守令
鮮循良以興起之也英廟臨御制召臺察歲舉守令延佑七
年澄城簿郭質來宰是邑政治大行惟善以教稽之舊典興
復米山等五十九里之文館像聖揭虔光輝盛德如瞻仰高
深於闕里也泰定甲子翼以御史出僉淮西歸展先壟于高

良米山人午用等請曰令尹興學耄倡髻從求記麗牲之石
以垂不朽噫聖天子崇儒重道于其上賢百里承流宣化于
其下凡爲人之子與弟者當念在上之恩朝夕黽勉從事於
經學庶幾希聖希賢出則忠國處則孝家則鄉校爲不虛設
矣若夫銜詞章徼利達孜孜於時好非翼之所敢知也旣以
答用等且以識程子之後有能弘其道者爲循吏傳張本云
質字彥文真定人

重修天井關夫子廟記畧

劉德盛學正

世傳夫子至此還轅人因建廟壁記有唐駕部郎中程浩所
撰碑宋直龍圖閣崔德符等所題柱金則有西溪姚俊升錄
寄隱者王勝之之所跋勝之子子安爲時聞人計其世金盛
日關民富庶及國兵南下關當路隘無人煙者又六十年後

稍安集亦未土著寄寓于附近村落廟之所存者惟正殿而已爲行旅往來止宿之所圯毀荒蕪人不堪憂至元壬申皇甫瑛國瑞來守是邦甚憫悼焉以關之故民勝之之孫慶顯重孫弼蔡欽張福等八家供糧餉計功役集不日而廢修墜舉矣後十餘歲人亡政息誰其留意者瀟然一如喪亂之時元貞踰年改元詔下之後天下承風廟之廢者例多修完郡侯劉仲元善甫始倡其議以爲事則易耳奈日後何須關復市廟恒產則利有所依費有所給乃可遂議民居以實市朔客店以屬廟未盡施行瓜代而去晉城尹李從仕和甫衛人也至自相幕途經廟前慨然有重修之志下車是其議而力爲之躬往致奠括店之所得以實用聽市之三十二家以供糧役期望後之君子嗣而興之庶乎及遠可乎大德四年立

石

重修旌忠廟記

歸 賜

唐亡數十年間帝制中土者更八姓而五易代天下爲傳舍世之君臣以其勢不以其義前者仆後者興翁翁焉以附望望焉以去武弁文紳愧於螽蟻之合散雖大臣不免也是故或十年一易其國或二三十年一更其主曆數推移駛猶轉電人紀不立非獨天使之然也嗚呼當是時有能嬰孤陴以抗不義方張之兵寧死無所屈如忠烈裴侯者可不謂賢乎宋歐陽子論著五代之史記於世道屢歎焉獨稱梁王彥章南唐劉仁贍與侯爲全節之士三侯之爲人槩可想見然彥章元帥也固其君跪而推轂付以閫外之事者仁贍節度使也連城數十繇地數千里皆稟其進退其任屬專其體貌重

事效不立宜如之何不死不可也侯潞之牙將以兵守澤州於其國家甚疏遠而位又卑乃能不附叛人不從僞國以城郭爲邱墓而與之俱沒較彼二人者豈不尤賢乎侯有爵又有廟尙書王孝迪爲之請廟之成也提點刑獄劉燾爲之記時爲宋宣和上距侯死已二百年與侯爲先後窮寵極貴而以累朝勲德自負者其姓名雖存不宜涕瀟而爵之而廟之乎然爵以侯之廟以神之死者不與知也後人之欲以爲興士氣厲臣節訓迪民彝之具是則不可廢廟一再葺至于今又將入于壤守州者河南葉君企顏當軍旅往來之道不以送迎供餽爲勤上倡下和胥悅以從吏於澤者割其俸民於澤者捐其資正殿神明制仍其舊而革其瓦木土石之不可以訟者重建兩廡高明廣閒神樓孔安始于至正壬寅之季

春成于乙巳之仲秋走書數百里請記其書曰侯古澤守也有大節廟食于茲且三百年壞不更修企顏雖不暇給于政其何以逃君子之譏乎起其廢作新之非近名也所以自厲而又以厲人焉其他作而無裨世教者則不敢以干子余嘉君能不以簿書期會爲政事而有意于風俗記之不辭侯裴氏名約事具史傳者不詳著于篇額其廟曰旌忠亦宣和所賜也元至正壬寅秋集賢學士資德大夫致仕浚儀歸賜記

陽城縣尹趙侯興學記

李聰

燕南鄉貢

國家之隆替繫乎人材之盛衰而人材之盛舍學校無以爲也董仲舒曰養士莫大於學校而學校賢士之關教化之本事也洪惟我元京師有學路府有學下至州邑亦有學仍舊制也命郡邑敦勸屢勤于詔旨故守令率精白一心以稱上

旨唯恐或後詔頒文治天下文明於斯爲盛陽城一邑在獲
澤之西僻處山谷土瘠民貧而俗樸魯鄉閭無弦誦之聲久
矣我趙侯來尹是邑首倡之趙侯燕都人名繩祖字嗣宗故
家喬木以陰得叙擢至正辛卯之初朝廷方遴選守令迨明
年春我侯以選除是邑下車之日政尚凝簡不事鞭笞慨然
以得賢才正風俗爲本蓋興校育材化民成俗卽程明道尹
晉城之遺意也侯嘗曰文翁之治蜀常袞之治閩猶以能興
起斯文爲已任而國家獲多士之用矧堂堂天朝文治丕隆
有非漢唐之可比而陽城在帝堯冀都之域又非閩蜀可同
年語也今觀縣泮則廊廡頽圯蕪穢不治青衿闐然而不聞
有挑達之咏觀民風則椎埋囂悍珥筆日興是皆庠序之不
興教化之不明也因與僚屬作而振之于是僉允其意重修

廟貌新構講堂親爲篆正蒙等字賜之旣而收書籍製儒服
廣生徒凡在泮宮輪奐一新靡不周悉時公卿弟子凡民俊
秀始鼓篋入學侯每于朔望之旦臨政之暇舍菜于廟聽講
于堂躬自勸勉不期年而民化之澆風大變獄訟日簡弦誦
之聲聞耳洋溢皆我侯之規範也時則有教諭劉從道洎前
教諭栗翔儒師聶希賢等請文諸石以紀興學之由余辭之
不獲竊謂國家之隆替未始不由人材之盛衰而人材之盛
衰又繫乎學政之興廢宋當淳熙之季朱文公乞復書院時
朝野誼謂州縣已有學校不必煩費文公之議曰先王禮義
之宮與異端鬼道之居孰正孰邪三綱五常之教與無父無
君之教孰利孰害今釋老之居與郡縣庠舍什伯不侔何有
司不察之甚耶嗚呼此可見當時宰執守令皆凡庸非明時

之比也今趙侯以文公之心爲心他日居鼎鼐職鹽梅舉而措之亦猶是爾故喜而書之以爲來者道也噫人材之不出學校之不修豈特爲彈丸地之羞亦將爲有國之憂

陽城縣風雲雷雨壇記

趙民望 進士

洪武己酉之秋予自西歸客陽城門人郭輝方典縣教謁予寓館請曰自去歲戊申季冬平陽郡縣相率內附朝廷遂以鄧州李君知陽城縣事真定方君主陽城縣簿今歲孟春奉詔祀風雲雷雨師始也各欲立壇其祀日亦各異未幾復奉詔俾同壇祀之定位于城南壇高三尺其方三十有五尺四出陛三級爲燎壇于壇南東偏繚以周垣爰作四門其外左方作神厨厨旁作庫以貯祭器皆四楹焉鑿井取水作宰牲房置宰牲案開洗牲池用太牢豫爲畜牧告祭以驚蟄報祭

以雷收禮以三獻祝以文北面而行事自京及郡縣皆然當是時也二君旣立壇以祀顧歲饑民力不堪侯十月農隙厨庫池井之類方俱作焉邑之士民咸謂當刻石以紀歲月子其紀之欽惟國家受命維新光岳氣合宜乎首舉祀典蓋禮莫重于祭祭莫重於天風雲雷雨皆在天之神司其職而成其化者嘗考先王卦序震居東北雷以動之也陽始用事于陽方歷離兌至乾則陽極陰生巽居西南風以散之也陰始用事于陰方歷坎艮至坤則陰極陽生此雷風相薄于陽變陰化之機夫陽變陰化乃一氣而分動靜必與雲焉必致雨焉詩曰有渰萋萋興雨祁祁傳謂雲欲盛盛則多雨雨欲徐徐則入土此先天居坎以西爲雲爲雨者也以後天考之震居東巽居東南則又相與於春生夏長之交而流行四時坎

居北則又當于位極陰之方而周浹四海朝廷著有令典同壇以祀於城之南則亦古者祀天于南郊圓也今乃推其義而爲之制與作燎壇者亦取天道明升義也舉事而質諸前代或止祀風雨或兼祀風雨雷其壇壝其門垣若無所甚異者至於厨庫池井宰牲房案豫養其牲牲用太牢必色純必體完則前代初未之及厥今祀事可無遺恨陽城賢有司當兵塵方晏創始爲制其于上奉明詔下恤民隱二者權而適宜非賢其若是乎繼自今也祀不失禮神人以和將見冬無愆陽夏無伏陰無淒風無苦雨無迅雷庶物露生百穀用成咸躋于仁壽之域也必矣李君名芾字文輝明經舉進士方君名渭字彥清嘗以才從事於省府二君先世皆以詩禮相傳故今德器成就非他人所可望則其相與以有爲也或非

他邑所可比焉是爲記

卷之四十五

卷之三十一

